

钦定四库全书
春秋后传
提要

经部五
春秋类

【臣】等谨按春秋后传十二卷宋陈傅良撰傅良字君举【案傅良或作傅良诸本误有异同然其字曰君举则为傅说举于版祝之义故今定为传字】号止斋温州瑞安人乾道八年进士官至中书舍人竇谟阁待制谥文节事迹具宋史本传是编有其门人周勉跋称傅良为此书□脱稿而病学者欲速得其书俾佣书传寫其已削者或留其帖于编增入是正者或揭去弗存是今所传已非傅良完本矣赵汭春秋集传自序于宋人说春秋者最推傅良称其以公穀之说参之左氏以其所不书实其所书以其所书推其所不书得学春秋之要在三传后卓然名家而惜其悞以左氏所录为鲁史旧文而不知策书有体夫子所据以加笔削者左氏亦未之见左氏书首所载不书之例皆史笔也非笔削之旨公羊穀梁每难疑以不书□义实与左氏异师陈氏合而求之殊失其本故于左氏所录而经不书者皆以为夫子所笔削则其不合于圣人者亦多云云考左氏为春秋作传非为策书作传其所云某故不书者不得经意或有之必以为别□史例似非事寔况不修春秋二条公羊传尚有传闻不应左氏反不见均恐不足为傅良病惟以公穀合左氏为切中其失耳自王弼废象数而谈易者日增自啖助废三传而谈春秋者日盛故解五经者惟易与春秋二家著录独多空言易骋兹亦明效大驗矣傅良于臆说蠹起之日独能根据旧文研求圣人之微旨楼钥序称其于诸生中择能熟诵三传者三人曰蔡幼学曰胡宗曰周勉游宦必以一人自随遇有所问其应如响其考究可谓至详又其书虽多出新意而每传之下必注曰此据某说此据某文其征引可为至博以是立制世之枵腹而谈褒贬者庶有豸乎傅良别有左氏章指三十卷楼钥所序盖兼三书言之朱彝尊经义考注曰未见今永乐大典中尚存梗槩然亦残阙不能成帙故不复哀录焉乾隆四十一年五月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

春秋后传左氏章指原序

春秋后传左氏章指二书故中书舍人止斋陈公傅良之所著也春秋之学不明久矣啖赵之后至于本朝而后有泰山孙先生复尊王之说弥彰公是刘先生敞权衡意林等书订证尤详伊川程先生颐虽无全书而一序所该圣人之大法备矣自王荆公安石之说盛行此道几废建炎绍兴之初高宗皇帝复振斯文胡文定公安国承伊洛之余推明师道劝讲经筵然后其学复传学者以为标准可谓大全矣东莱吕公祖谦又有集解行于世春秋之义殆无余蕴止斋生于东嘉天资绝人诵书属文一旦迥出诸老先生上歛然布衣声名四出六经之说流行万里之外而其学尤深于春秋钥非深于此者尝涉猎诸公之书非不明白然亦不过随文辨释间有前后相为□明者亦不见体统所在钥自客授之初即从止斋游虽不得执经其门尝深叩之同在西掖时始以隐公后传数篇相示因为道春秋之所以作左氏之所以有功于经者其说卓然且曰自余之有得于此而欲

著书于诸生中择其能熟诵三传者首得蔡君幼学蔡既壮又得二人焉曰胡宗曰周勉游宦必以一人自随遇有所问其应如响而此书未易成也未几去国而钥亦归虽若相忘于江湖而朋友之来必以此书为问虽亲炙之者跪以请则曰此某身后之书也既不幸卒于嘉泰三年而此书始出于笥中其壻林子燕最得其传又四年而后长子师辙与其徒汪龙友以二书来钥老矣如获希世之珍屏去他书穷昼夜读之始尽得其大意呜呼盛哉盖未有此书也先儒以例言春秋者切切然以为一言不差有不同者则曰变例窃以为未安公之书不然深究经旨详阅世变盖有所谓隐桓庄闵之春秋有所谓僖文宣成之春秋有所谓襄昭定哀之春秋始焉犹知有天子之命王室犹甚威重自霸者之令行诸侯不复知有王矣桓公之后齐不竞而晋霸文公既亡晋不竞而楚霸悼公再霸而又衰楚兴而复微吴出而盟诸夏于越入吴而春秋终矣自杜征南以来谓平王东周之始王隐公逊国之贤君其说甚详而公以为不为平王亦不为隐公而为桓王其说为有据依又其大节目如诸侯改元前所未有齐鲁诸大国比数世间有世而无年至记厉王奔彘始有纪年古者诸侯无私史乘与桡杌春秋皆东迁之史也书齐郑盟于石门以志诸侯之合书盟于咸以志诸侯之散是春秋之终始也隐桓庄之际惟郑多特笔襄昭定哀之际惟齐多特笔诸侯専征而后千乘之国有弑其君者矣大夫专将而后百乘之家有弑其君者矣宋鲁卫陈蔡为一党齐郑为一党公會齐郑于中邱而后诸侯之师衡行于天下罪莫甚于郑庄宋鲁齐卫次之而父子兄弟之祸亦莫甚于五国是可为不臣者之戒矣齐桓公卒郑遂朝楚诸侯从楚郑为乱阶侵蔡遂伐楚以志齐桓之霸侵陈遂侵宋以志楚庄之霸足以见中外之盛衰矣书公孙兹帅师书公孙敖帅师书公子季友卒习见三家之所从始首止之盟郑伯逃归不盟则书以其背夏盟也厉之役郑伯逃归不书盖逃楚也中外之辨严矣自隱而下春秋治在诸侯自文而下治在大夫有天下之辞有一国之辞有一人之辞于干戈无不贬于玉帛之使则从其爵劝惩著矣文十年而外秦又三十年而外郑又五十余年而外晋外郑犹可也外晋甚矣贬不于甚则于事端余实录而已矣此皆先儒所未□至僖之三十二年四卜郊不从乃免牲犹三望极言鲁之用天子礼乐以明堂位之言为不然惠公始乞郊而不常用僖公始作颂所以郊为夸引祝 之言为证此尤为前所未闻也若左氏或以为非为经而作惟公以为著其不书以见春秋之所书者皆左氏之力章指一书首尾专□此意昔人以杜征南为邱明忠臣然多曲从其说非忠也公之章指谓君子曰者盖博采善言礼也者盖据史旧闻非必皆合于春秋或曰后人增益之或曰后人依倣之或以凡例义浅而不取或以例非左氏之意盖爱而知其恶者迺所以为忠也又言庄公元年至七年及十九年以后讫终篇多无传疑有佚坠公之求于传者详矣呜呼与止斋游前后三十年不得卒业于其门既兴殄瘁之悲而后得二书其间尚有欲质疑而不可得此所以抚卷三叹而不能自己也开禧三年冬至日四明楼钥序

先生为后传将脱藁而病替歲而病革学者有欲速得其书俾佣书传写其已削者或留其帖于编增入是正者或揭去弗存也勉宦江陵还始得朋友订正之然已削者可刊帖于编而增入是正者不可复求矣惜哉勉从先生于桂阳于衡于潭日受经焉及后传且就先生每语友朋将面授勉使尽质所疑而后出已而睽隔函文不果质今订正犹先生之志云嘉定元年七月朔日门人周勉谨书

春秋非始于平王始于桓王也平王东迁卫郑二武入相于周【卫武公十二年郑武公二十七年】诗人为之赋洪澳缙衣凡伯仍叔家父皆大雅旧人也故五十余年东诸侯无他故而秦亦列于国风当是时鲁隱之奉其弟轨宋穆之舍其子冯诸侯犹有让千乘之国者也卫石碣之讨州吁晋九宗五正嘉父之纳鄂侯宋孔父之死于殇公臣子犹知尊君亲上也鲁众仲之论族晋师服之述封建卫郑齐秦之诗则据经守古之士为多也郑庄公为卿士王貳于虢于是周郑交恶隱之三年平王崩桓王即位四年而郑始朝身为卿士而有志于叛王纠合诸侯于是入郟又入许释泰山之祀首为参盟成宋乱矣桓不胜忿自将以伐郑 葛之败彝伦攸斲春秋所以作也是故克段于鄢盟于石门来归禘来渝平郑伯伐取之以璧假许田齐侯郑伯如纪终庄公之篇皆特笔也春秋数致意焉则是作经之始也夫子论六经系文侯之命于西周之末托春秋之始于隱公著其世次以伤周之不竞故曰如有用我者吾其为东周乎拨乱世反之正则其志诚在春秋也元年

惟王者然后改元【本何休周语宣王三十二年立鲁孝公襄王十六年立晋文公则周策书旧文也】诸侯改元自汾王以前未有也是故鲁自周公至真公九世齐自太公至武公七世晋自唐叔至靖侯五世蔡自蔡仲至夷侯六世宋自微子至厘公八世陈自胡公至幽公六世皆大国也但有世而无年世家鲁真公十四年齐武公九年宋厘公十七年晋靖侯十七年楚熊勇六年陈幽公十三年始记厉王奔彘则纪年所由起也则作史改元皆共和之际【晋竹书纪年终宣王起殇叔盖宣王中兴诸侯复稟命至幽王而遂叛】他如吴至壽梦十九世越至勾践二十余世而后始有年燕自召公至昭王而后始有名秦自秦仲至文公而后始有史皆僻遠晚兴者也至于史法亦不尽循周制晋竹书曲沃庄伯十一年十一月则用夏正为岁首【庄伯十一年十一月隱公之元年正月也见杜预左传后序】而秦谱至宣公初志闰月不惟改元又改历矣

春王正月【有传】

鲁谓之春秋者其书法以四时冠月也以夏时冠周月非周之旧典也西周之史言时皆夏时也言月皆周月也言时皆夏时于周官见之【季春出火非周三月季秋纳火非周九月仲夏斩陰木非周五月仲冬斩阳木非周十一月之类】言月皆周月于书见之【康诰三月召诰二月不言夏洛诰十二月不言春多方五月毕命六月不言秋伊训十有二月不言冬之类泰誓十有一年一月戊午盖追改旧序十三年春之讹说见章指】未有以夏时冠周月者也【惟诗以夏正数月至豳风于周正月则变文谓之一之日】以夏时冠周月则鲁史也夫子之修春秋每孟月书时以见鲁史每正月书王以存周正盖尊周而罪鲁也晋之乘楚之梲杞鲁之春秋皆东迁之史也古者诸侯无私史【本常州先生薛氏】有邦国之志则小史掌之而藏周室【太史公曰唯史记独藏周室以故灭惜哉】鲁人所谓周人御书晋人所谓辛有之二子董之晋于是有董史者也是故费誓系于周书汉汝江沱至于谭大夫下国之诗皆编入于南雅自三史作而国自为史矣

三月公及邾仪父盟于蔑【有传】

特相盟也特相會盟不书【据传僖二十四年晋侯會秦伯于王城僖二十八年晋侯齐侯盟于斂孟之类】唯内悉书之

夏五月郑伯克段于鄢【有传】

曰郑伯克段讥不在其臣子也【本穀梁目君例】克之为言胜也以千乘之国胜其弟

云尔于鄢言在外也然则段无罪与先君之子称公子有谓称弟必篡若争国也而后但名之【据卫州吁陈佗之类】段不得列于子弟之称则段有罪矣段称弟则疑于佞夫段称公子则疑于御寇

秋七月天王使宰咺来归惠公仲子之□【有传疑非是说在章指】周大夫不名【据传宰周公孔毛伯卫之类】爵从其爵【据单伯刘子之类】未爵称字【据南季家父荣叔之类】必微者而后名之【据内史叔服官师刘夏之类】卒名之【据王子虎刘卷】舍是无名道矣而名之者贬也何贬乎宰咺命妾母也王人未有书官者于是特书宰有赠妾母者矣【据荣叔】必宰自为使而后贬贬其甚者也古者诸侯不再娶再娶亦妾也【或疑再娶非妾少姜卒公如晋及河晋使士文伯来辞曰非伉俪也请君母辱】于是隱将让桓以夫人之礼丧其母而赴于京师归赠盖命之也其曰惠公之仲子者修春秋之辞也

九月及宋人盟于宿

鲁宋合也及宋人皆微者也【本穀梁】微者虽接我不书【据传隱四年宋使来乞师之类】内微者亦不书【据传宣十八年公使如楚乞师昭二十七年公使子家子如晋之类】此何以书参盟之端见矣忧参盟故录其所从始也

冬十有二月祭伯来【有传】

来未有无辞者无辞以为称则但书来但书来所以外介狄也【据介葛卢白狄】祭伯襄内诸侯无天子之命而私交鲁【左氏穀梁同】祭伯内诸侯也而与介狄同文苟无辞虽王人一以是书之

公子益师卒

二年春公會戎于潜【穀梁有传】

會戎于潜春秋之始會吴黄池春秋之终此春秋之所以终始也

夏五月莒人入向

入君大夫将皆称人君将则书君自楚庄王入陈始大夫将则书大夫自晋郤缺入蔡始惟内大夫则书之

无骇帅师入极

入恒称人唯内书大夫帅师司空无骇也其曰无骇未命大夫也【传在八年】春秋之初鲁有无骇挟郑有宛詹纪有裂 则犹有未命大夫也

秋八月庚辰公及戎盟于唐九月纪裂 来逆女春秋之初大夫恒称人必有好事于诸侯则书其大夫已命字之未命名之各从其称无讥焉尔内女为夫人凡八见于经未有来逆者【本公羊传例逆女不书】书逆纪伯姬吾女遭人伦之变者也礼娶夫人之辞曰请君之玉女与寡人共有敝邑伯姬丧在殡纪侯失国齐人□之鲁问不及焉故详之也【穀梁氏国例今不取】

冬十月伯姬归于纪

内女为夫人恒书归不书归者必有故也是故齐子叔姬不书归【文十五年出】郟伯姬不书归【宣十六年出】□叔姬不书归【成五年出】以为尝失位也非有故也而不书归者非君夫人也【据宋荡伯姬】

纪子帛莒子盟于密

纪子帛阙【杜预子帛裂 字盖意之也不取】外特相盟也特相盟不书书纪莒志诸侯之合也

十有二月乙卯夫人子氏薨【无传穀梁氏隱之妻也】

夫人薨未有不□者其不□隱不以夫人之礼丧其妻也隱不以夫人丧其妻其曰夫人者修春秋之辞也

郑人伐卫

郑卫交怨也侵伐君将称君大夫称人【据诗卫州吁使公孙子仲将文元年卫孔达之类】用众焉称师大夫将则书其大夫自晋阳处父始

三年春王二月己巳日有食之三月庚戌天王崩夏四月辛卯尹氏卒【有传】

声子则曷为称君氏隱不以夫人之礼丧其母也于是隱将让桓不以声子伉仲子也隱不以夫人之礼丧其母其曰君氏者亦修春秋之辞也是故不曰子氏且不言□曰子氏卒且言□则疑于定姒夫奉桓为太子【谷传谓探先君之邪志以与桓非是本东莱吕氏】而谓已摄主隱之志也而卒遇弑终隱之篇春秋盖三致意焉隱桓之母俱不得为夫人而隱之妻得为夫人隱桓之母俱不得为夫人则嫡庶之义明隱妻得为夫人则君臣之分定嫡庶之义明则桓非太子君臣之分定则隱非摄主也吾鲁史也何敢斥言之致意于三辞斯可矣

秋武氏子来求赙【有传】

周大夫有爵称爵未爵称字但曰武氏子则见非大夫也微者虽王人不书【据传隱六年京师来告饥宣九年王使来征聘之类】此何以书天王崩鲁赙不入来求不可以不录也【书来求赙故不书□】

八月庚辰宋公和卒冬十有二月齐侯郑伯盟于石门齐郑合也外特相盟不书必关于天下之大故也而后书莒纪无足道也齐郑合天下始多故矣天下之无王郑为之也天下之无伯齐为之也是故书齐郑盟于石门以志诸侯之合书齐郑盟于咸以志诸侯之散【事在定七年】是春秋之终始也【何氏所传闻之世外离会不书非是】夫子之作春秋于隱桓莊之际唯郑多特笔焉于襄昭定哀之际唯齐多特笔焉

癸未□宋穆公

四年春王二月莒人伐□取牟娄

外取邑不书【从公穀例】自隱以前则书之曷为自隱以前则书之春秋之初犹以取邑为重也【据传自桓十四年宋以诸侯伐郑取牛首而后皆不书】

戊申卫州吁弑其君完【有传】

公子州吁则曷为但称州吁隱桓莊之春秋凡贼皆名之于是公子初弑君卫人为之变终风日月之诗作于宫中击鼓作于国中也不逾年卒讨之是故州吁不称公子而石碻得书人东迁之初国犹有臣子矣合五国之众不能定州吁而杀于濮于濮言未得国也见卫之有臣子也

夏公及宋公遇于清宋公陈侯蔡人卫人伐郑

于是诸侯初會伐君将称君大夫称人先宋序爵也是定州吁之师也曷为君大夫各从其恒称春秋之达例三有同号者焉有同辞者焉有同文者焉号不足以尽意而后见于辞辞不足以尽意而后见于文以同文为犹未也而至于变文则特书也于是公子初弑君卫人为之变不逾年能讨之卫犹有臣子也而五国之君大夫伐郑以定州吁弑君天下之元恶也五国之君大夫有人心焉不若是甚矣书曰宋公陈侯蔡人卫人伐郑秋翬帅师會宋公陈侯蔡人卫人伐郑书之复书之终春秋才一再见焉特书之法严矣则君大夫各从其恒称是达例而已尔后卫不以卫主兵也

秋翬帅师會宋公陈侯蔡人卫人伐郑【有传】

公子翬则曷为但称翬以大夫而會伐于诸侯于是始故名之也外大夫则称人会伐未有言帅师者【据文三年叔孙得臣成八年叔孙侨如之类】特言帅师翬弑隱者也诸侯专征而后千乘之国有弑其君者矣大夫專将而后百乘之家有弑其君者矣

九月卫人杀州吁于濮

石碣非大夫则何以得书讨贼天下之大义也苟能讨虽微者得书异邦人得书【据蔡人杀陈佗】夷狄得书【据楚子杀陈夏徵舒书人】苟不能讨虽以四国之大夫伐宋不书其大夫【事见文十七年】疑于讨也而非讨则虽以十二国之君伐齐不书伐矣【事在襄二十五年】讨贼天下之大义春秋重以予人也

冬十有二月卫人立晋【有传】

公子晋也公子不称公子必尝争国者也卫人立晋则曷为以争国之辞书之卫之臣子可以讨贼不可以置君州吁为僇而晋受之上无天子下无君父是亦争国而已矣继故未有书立者贼不讨君不□讥不在立也是故宋殇之弑也冯立闵之弑也御说立晋灵之弑也黑臀立厉之弑也周立皆不书也必若卫人贼讨君□而后可以书立矣

五年春公矢鱼于棠【有传】夏四月□卫桓公秋卫师入郕九月考仲子之官初献六羽【有传并公羊传】

仲子之宫别庙也古者妾祔于妾祖姑无妾祖姑则易牲而祔于女君别庙非礼也隱将让桓尝以夫人之礼丧仲子为是改筑而用备乐焉礼未之有也是故特书初

邾人郑人伐宋

先邾主兵也唯主兵虽小国叙大国之上【据桓十三年及齐侯宋公僖二年虞师晋师之类】非主兵也而小国叙大国之上则伯者为之也【据莊十六年许男滑伯文十四年许男曹伯文十五年邾子□伯之类】世子长于小国之君甚矣【据襄十年齐世子光滕子薛伯□伯小邾子传曰光先至故长于滕】

螟冬十有二月辛巳公子 卒宋人伐郑围长葛宋郑交怨也伐国不言围邑【从穀梁例】自僖以前则书之曷为自僖以前则书之春秋之初犹以围邑为重也【据传自僖十八年邢狄围卫菟圃不书至二十六年书楚人伐宋围缙之后皆不书矣】

六年春郑人来渝平【有传】

渝平释憾而为平也平不书【据传明年宋及郑平宣七年郑及晋平之类穀梁外平不

道非独外也文十六年及齐平襄二十年及莒平哀八年及齐平皆不书】必关于天下之故而后书书郑渝平以志诸侯之合书及郑平以志诸侯之散是春秋之所终始也
夏五月辛酉公會齐侯盟于艾

春秋之初宋鲁卫陈蔡一党也齐郑一党也于是郑始平鲁郑方交恶于王而亟平齐鲁将以合诸侯焉尔
秋七月冬宋人取长葛
七年春王三月叔姬归于纪

娣不书书纪叔姬吾女遭人伦之变者也纪侯失国叔姬托于纪季鲁问不及焉故详之也

滕侯卒夏城中丘齐侯使其弟年来聘秋公伐邾冬天王使凡伯来聘戎伐凡伯于楚丘以归

八年春宋公卫侯遇于垂
特相遇不书书宋卫将以为参盟也
三月郑伯使宛来归祊【有公羊传】

田邑皆书取【据防郕】此郑邑也则曷为谓之来归于是桓王即位四年矣而庄公始朝王不礼焉郑有志于叛王而合诸侯渝平归祊皆逊辞也纠合之道也

庚寅我入祊
入未有言我者言我交讥之辞也
夏六月己亥蔡侯考父卒辛亥宿男卒秋七月庚午宋公齐侯卫侯盟于瓦屋

诸侯初参盟也传曰诸侯之参盟于是始有参盟然后有主盟矣春秋之初宋鲁卫陈蔡一党也齐郑一党也郑有志于叛王而合诸侯于是渝平于鲁齐亦为艾之盟以平鲁为瓦屋之盟以平宋卫所谓成三国也东诸侯之交盛矣

八月□蔡宣公九月辛卯公及莒人盟于浮来
公及大夫盟则不以大夫敌公【据齐大夫晋大夫之类】非大夫也则但称人
螟冬十有二月无骇卒
九年春天王使南季来聘三月癸酉大雨震电庚辰大雨雪【有传例说在章指】
记异也【本公羊】太史公曰孔子论六经记异而说不书得春秋之指矣
挟卒【有公羊传】夏城郎秋七月冬公會齐侯于防
十年春王二月公會齐侯郑伯于中丘

王师不书【据传隱元年伐卫五年伐曲沃桓四年围魏之类】于是宋不王郑伯复为左卿士以王命讨之會于中丘为师期也则何以书墮天子之令于是始也东迁之后诸侯专征矣小者修怨大者定篡弑虽然犹未衡行于天下也郑伯受命伐宋尔何为乎中丘之會郑有志于叛王而合诸侯故无王命而私會齐鲁齐鲁亦无王命而私會于郑而后诸侯之师始衡行于天下

夏翬帅师會齐人郑人伐宋

翬何以再不称公子隱桓庄之世吾大夫會伐恒名之此中丘诸侯也曷为會称君伐称人畧之也春秋举重一役而再有事不悉书【据襄十八年會于鲁济同围齐不书会昭

三十二年盟于狄泉城成周不书盟之类】苟再见必前目而后凡也一役而再见但人之者畧之也郑伯卿也而首墮天子之令故畧之也

六月壬戌公败宋师于菅

外书伐不书败伐而败焉不足书也【据传宣九年楚伐郑郑败之柳棼成三年诸侯伐郑郑败之邱舆之类不言败】必交战也而后言战言败绩惟内师悉书之胜焉则书败某师败则但书战必會他国之君大夫也而后从外辞言战言败绩【桓十三年公会纪侯郑伯成二年季孙行父臧孙许叔孙侨如公孙婴齐会晋却克卫孙良父曹公子首】

辛未取郟辛巳取防

于是郑师入郟辛未归于我郑师入防辛巳归于我则曷为以内取书之蔽罪于鲁也春秋严义利之辨苟以为利书吾取而已是故郟防书取讥不在郑也济西田书取汶阳田书取邾田书取讥不在晋也必若郑伯以泰山之祊易许田而后可以言来归焉尔

秋宋人卫人入郑宋人蔡人卫人伐戴郑伯伐取之冬十月壬午齐人郑人入郟

此齐侯郑伯也入国虽君将贬人之于是入宋不书有王命也

十有一年春滕侯薛侯来朝

诸侯相朝初旅见也古者邻国世相朝是以有两君之好旅见非邦交之旧矣

夏公會郑伯于时来秋七月壬午公及齐侯郑伯入许入虽君将贬人之唯吾君會焉则君将称君宋不王郑伯以王命讨之由是入郟又入许取宋蔡卫三师焉夫以王命讨不庭顧因以为暴许无君者十有五年甚矣郑之专也于是许庄公奔卫不书非其罪也凡奔非其罪不书奔非其罪莫甚于被兵者也是故许男奔卫不书须句子奔鲁不书【事在僖二十二年】

冬十有一月壬辰公薨【有传说在章指】

鲁之春秋固书曰公子翬弑公于寯氏圣人修之曰公薨春秋之法内外恒异辞遇弑君父之大哀也则吾何忍言之是故书薨而不地且不薨十二公所同也不地不隐闵所独也然则虽讳而乱臣贼子之狱具矣

春秋后传卷一

钦定四库全书

春秋后传卷二

桓公

宋 陈傅良 撰

元年春王正月公即位

自隱至文六君则曷为再书即位君薨既殡嗣子即位于柩前虽逾年恒称子必类见焉而后列于诸侯东迁之诸侯既逾年而即位改元视天子非周制也【啖说非是】自隱至文六君唯桓文书即位则亦唯桓文书□命是不特类见之礼废虽请命亦废矣成公以后皆书即位而无锡命王室区区所以感讽诸侯之意不复讲也

三月公會郑伯于垂郑伯以璧假许田

取许田则曷为谓之以璧假郑伯之辞也公羊氏曰为恭也春秋之初诸侯之为恶必有辞焉以自文郑伯以璧假许田齐侯郑伯如纪单伯送王姬筑王姬之馆于外皆善辞也夫子伤周之敝曰利而巧文而不慙于春秋著其事所以见王化衰风俗日趋于变且以□明郑庄之欺也爰段之辞立许叔之辞劳王问左右之辞足以祸五世矣

夏四月丁未公及郑伯盟于越秋大水冬十月

二年春王正月戊申宋督弑其君与夷及其大夫孔父【有传并公羊传】

华督则曷为但称督隱桓庄之春秋凡贼皆名之及其大夫孔父言不杀孔父则不能弑其君也牧息书及以尊及卑也督先杀孔父而后弑君书及则并也左氏得之死节人臣之极致也春秋贵死节虽太子不书【据传卫□喜杀太子角楚比杀太子禄】必大臣也然后书大臣谊与其君存亡者也虽大臣也苟不能与其君存亡则亦不书是故晋栾书中行偃先杀胥童而后弑君不言及楚商人先杀鬬勃【子上】而后弑君不言及死节人臣之极致春秋重以予人也孔父嘉不名命大夫也

滕子来朝三月公會齐侯陈侯郑伯于稷以成宋乱會未有言其所为者其曰成宋乱弑君之祸接迹于天下于是焉始也向也合五国之君大夫以定州吁而州吁讫于讨今也合四国之君以立华督督遂相宋庄弑君之祸接迹于天下四君为之也春秋之褒贬至于变文严矣向也五国之君大夫书之复书之终春秋仅一再见焉以变文为犹未也而直言其所为舍此无复见者矣虽然有孔父焉则东迁之初国犹有臣子也是故华督但名之

夏四月取郟大鼎于宋戊申纳于太庙

于是宋以郟鼎赂公齐陈郑皆有赂则其书取何蔽罪于鲁也春秋严义利之辨苟以为利一以取书之是故郟鼎赂鲁也济西田赂齐也书取而已矣齐侯连五国之师抗王子突而纳卫朔则书曰来归卫俘非取之者之罪矣

秋七月□侯来朝蔡侯郑伯會于邓

传曰始惧楚也

九月入□

内桓言大夫帅师但曰入□何唯桓师非君将皆不言大夫桓师非君将则曷为皆不言大夫桓以大夫弑隱而后立故桓师非君将则其大夫专也【杜谥削公以著贬】

公及戎盟于唐冬公至自唐【有传】

始至盟也【说在十六年至伐郑例说在章指】

三年春正月公會齐侯于嬴夏齐侯卫侯胥命于蒲胥命者交相命也相命也者相推长也诸侯不禀于天子而私相命于是始子颓之乱虢公郑伯胥命于弭不书以其谋王室

也非王事也而胥命是相推长而已矣于是齐僖称小伯黎之臣子亦以方伯责卫宣桓文之事其所由来者渐矣【本薛氏】

六月公會□侯于郕秋七月壬辰朔日有食之既公子翬如齐逆女【有传】

翬何以得称公子大夫有好事于诸侯则各从其称无讥焉尔是故讥但称翬无讥则从其恒称为公子翬讥但称忽无讥则从其恒称为世子忽隱薨不地乱臣贼子之狱具矣则曷为书翬如他大夫翬弑隱而相桓鲁臣子无讨焉则固书翬如他大夫也桓立尚童年也于是长矣而相翬如故是德翬也德翬则是桓弑隱桓罪著矣名宰渠伯名邓穀之君春秋有以断斯狱矣

九月齐侯送姜氏于讙【有谷梁传】公會齐侯于讙夫人姜氏至自齐冬齐侯使其弟年来聘有年

四年春正月公狩于郎夏天王使宰渠伯纠来聘【有传说在章指】

周大夫不名名宰渠伯聘桓也王人未有书官者于是特书宰有聘桓者矣【据家父齐弟年】必宰自为使而后贬贬其甚者也

五年春正月甲戌己丑陈侯鲍卒【有穀梁传】

夏齐侯郑伯如纪天王使仍叔之子来聘【公羊穀梁有传】曰仍叔之子非见大夫也微者虽王人不书此何以书桓罪著矣再聘不可以不录也

□陈桓公城祝丘秋蔡人卫人陈人从王伐郑

王师不书书伐郑伐郑不服也伐郑不服而后王命不行于天下尝战矣而不言战尝败绩矣而不言败绩讳之也春秋之初王室多讳辞其曰蔡人卫人陈人从王伐郑尊王也春秋之法有天子在则其诸侯称人有诸侯在则其大夫称人【据隱四年蔡卫僖十八年卫邾之类】东周之不竞郑庄公为之也莊公相平王王貳于虢至于交恶平王崩四年而郑始朝桓于是郑虢相桓为左右以王命讨宋不庭而合齐鲁之师于中丘入宋又入许鲁翬之相桓也宋督之相莊也郑有力焉王夺其政而遂不朝王固有以失郑矣自□以讨郑讨郑而克是仲康之师也春秋可以无作而战焉王卒大败故曰伐郑不服而后王命不行于天下

大雩螽冬州公如曹【有传】

六年春正月寔来【有传】

以为来朝则非朝也来奔则非奔也但曰州公来则疑于祭伯故书曰州公如曹春正月寔来是不复其国之辞也春秋之修辞谨矣古者君去其国大宰取群庙之主以从而托于诸侯曰寓公先王所以通不得已也州公如曹寔来纪侯大去其国不书奔通不得已也

夏四月公會纪侯于成秋八月壬午大阅蔡人杀陈佗曰蔡人杀陈佗是讨贼之辞也佗之罪不著于春秋曷为以讨辞书之佗杀太子免而自立者也然则佗之罪曷不著于春秋陈侯鲍卒公子与太子争立犹两下相杀而已矣两下相杀不道【本穀梁例】两下相杀不道则其讨之何以庶孽乱正统如定何勿讨也书杀免则疑于齐荼不书杀佗则疑于晋重耳春秋之修辞谨矣是故佗尝逾年矣不成君而蔡人虽微得书人

九月丁卯子同生

生子不书【据子般子恶】此何以书志庄公之不能为子也桓公不良死于齐而不怨文姜之淫诗人所为赋敝笱载驰猗嗟也而不耻生十有三年而立三十有五年而文姜薨制于其母必齐女也然后娶而不悔庄公不足以为人子矣故其年不可以不志也
冬纪侯来朝

七年春二月己亥焚咸丘夏穀伯绥来朝邓侯吾离来朝【有传】诸侯不名爵从其爵未爵称字【据邾仪父简叔】必微不能自通者也而后名之【据邾黎来介葛卢】未成君名之【据郑忽曹羈】卒名之失国名之【据郑伯突卫侯朔之类】尝失国矣虽复入归亦名之【据卫侯郑曹伯襄】舍是无名道矣而名之者贬也名邓穀之君朝桓也古者邻国世相朝鲁在泰山之下邓穀在方城之外两君之好不相及人而亟朝桓有朝桓者矣【据□侯纪侯】必若邓穀而后贬贬其甚者也【公羊失地之君穀梁失国也皆非案左氏传桓九年巴子告于楚请与邓为好庄六年楚子伐申过邓析侯享之十六年灭邓不见失国事迹○失地之君不曰来朝苟有出者如卫侯朔奔齐谭子奔莒是也苟有来者如郕伯来奔州公寔来是也】

八年春正月己卯烝天王使冢父来聘夏五月丁丑烝【有公羊传】

秋伐邾

但曰伐邾何桓师非君将皆不言大夫

冬十月雨雪祭公来遂逆王后于纪

逆后六书非公卿也而后书是故原莊公逆惠后于陈不书【事在前十八年】召桓公逆定后于齐不书【宣六年】则祭公何以书后妃母仪天下而以遂專之也祭公不称使则王者有成命也王者有成命而以遂專之是故书遂始于此凡遂讥也莫甚于逆后罪祭公且罪鲁也

九年春纪季姜归于京师

后归不书【据传莊十八年陈妨传例非是说在章指】此何以书详纪事也后妃母仪天下以为天地社稷宗庙之主俄而宗国亡焉是不可不详也诸侯逆称女至称夫人尊夫人也天子称逆后归称季姜尊王也

夏四月秋七月冬曹伯使其世子射姑来朝【有穀梁传】十年春王正月庚申曹伯终生卒夏五月□曹桓公秋公會卫侯于桃丘弗遇冬十有二月丙午齐侯卫侯郑伯来战于郎【有传】

鲁自中丘之盟于齐郑未有异也于是齐郑谋纪會于成纪来谋齐难也而會卫弗周其曰来战于郎薄鲁之罪也

十有一年春正月齐人卫人郑人盟于恶曹

此郎之诸侯也曷为战称君盟称人凡一役而再见者但人之畧之也犹曰上无天子下无方伯莫适为主则人自为盟而已矣郑败王师齐灭后之母家而卫亦抗子突以自立其无王甚矣自有参盟莫甚于恶曹略之也

夏五月癸未郑伯寤生卒秋七月□郑莊公

春秋之初罪莫甚于郑莊宋鲁齐卫次之而父子兄弟之祸亦莫甚于此五国者莊公卒

高渠弥杀世子忽齐人杀子亶傅瑕杀子仪国乱者二十年鲁隱公弑宋殇闵相继弑卫桓公弑宣杀伋壽而立朔国人黜朔而立黔牟齐襄公弑雍廩杀公孙无知小白杀子纠是可为不臣者之戒矣

九月宋人执郑祭仲

祭仲足何以不名命大夫也祭仲以大夫專废置君者也以大夫專废置君则曷为从其恒称而不名春秋之褒贬名号不足以尽意则见于辞书曰宋人执郑祭仲突归于郑郑忽出奔卫斯其为辞也详矣则从其恒称不名可也

突归于郑

出非其罪归罪也则但书归凡归皆讥也凡归讥也莫甚于突故弗系之郑归未有不系国者突莊公子也而弗系之郑以为是篡郑也【据小白阳生称齐去疾展与称莒皆争国也唯突弗系之郑亦弗系之曹则篡辞也】

郑忽出奔卫【有穀梁传】

郑忽何不能为子也身为冢嗣而废立自权臣不可以言子矣是故书奔始于此州公如曹纪侯大去其国未可以言奔必若忽而后可以言奔尔虽然奔君未有言故者于是特言故犹愈于自取也

柔會宋公陈侯蔡叔盟于折

柔者何以大夫會诸侯盟于是始也故贬之【内大夫可以會外诸侯穀梁例不侔】至公子结不贬矣【事在莊十九年】

公會宋公于夫钟冬十有二月公會宋公于闕

十有二年春正月夏六月壬寅公會□侯莒子盟于曲池秋七月丁亥公會宋公燕人盟于穀丘八月壬辰陈侯跃卒公會宋公于虚冬十有一月公會宋公于□丙戌公會郑伯盟于武父丙戌卫侯晋卒

再书日日卫晋之卒也于以见春秋之有日例也春秋之日例莫谨于崩卒以往日赴则书往日以来日赴则书来日再赴则亦再日之舍卒而称日皆大事也是故非日辞必战也弑君也灭国而执杀其君世子大夫也则日之會不日會有盟焉则日盟有灭焉则日灭侵伐不日入之则日入溃之则日溃围不日灭之则日灭宜日而不日者不得日也凡日必甚之也是故公即位不日日定公夫人至不日日哀姜诸侯奔不日日卫侯衍入不日亦日卫侯衍执不日日鄫子外灾不日日宋卫陈郑外败不日日顿胡沈蔡陈许皆甚之也非甚之也者而称日则天变也郊荐之事也

十有二月及郑师伐宋丁未战于宋

此公及郑伯也曷为前称君后称师【本杜谔】略之也一后而再见者但人之用众焉称师于是欲平宋郑期岁之闲會于折于夫钟于闕于穀丘于虚于□而宋辞平遂舍宋而會郑师以伐宋战焉战不言伐【公羊氏例】战而言伐有不与战者也【据僖十八年宋曹卫邾伐齐宋及齐战而曹卫邾不书哀十一年公会吴伐齐齐及吴战而鲁不书】未始有不与战者而亦言伐则甚伐者也曰战于宋薄宋之罪也

十有三年春二月公會紀侯鄭伯己巳及齊侯宋公衛侯燕人戰齊師宋師衛師燕師敗績【有傳】

三月□衛宣公

凡君在喪恒稱子【據僖九年宋子二十五年衛子定四年陳子】衛宣公未□則其稱衛侯何不以居喪之禮出也衛朔宋固【成三年】陳溺【襄五年】猶逾年也鄭費【成三年】未逾年亦曰鄭伯甚矣春秋之法苟在喪也未逾年不成君是故衛戴公不書卒鄭忽曹羈之奔也但書名此亦未逾年也而自稱衛侯吾從而志之無改焉何也以其不成君則春秋不可以弗辨苟繼世矣則春秋弗辨也從而志之徒見其悖禮焉耳故凡春秋辭從主人皆實錄而已非修春秋之辭也

夏大水秋七月冬十月

十有四年春正月公會鄭伯于曹無冰夏五【穀梁有傳】鄭伯使其弟語來盟秋八月壬申御廩災乙亥嘗【公羊穀梁有傳】冬十有二月丁巳齊侯祿父卒宋人以齊人蔡人衛人陳人伐鄭

伐未有言以者則其言以何用諸侯之師於是始也東遷之後諸侯雖會伐非一國之志也非一國之志也則會者序爵而已矣【據隱四年伐鄭十年伐戴桓十五年十六年伐鄭十七年伐邾皆先宋】雖主兵也而小國序大國之上【據隱五年邾鄭伐宋莊五年齊宋伐衛】亦非一國之志也以一國而用諸侯之師於是始上無天子下無方伯有以一國而用諸侯之師者矣書以此伯之所由興也伯者之令行于天下自是無書以者書以者必中國用外域者也【據僖二十六年公以楚師定四年蔡侯以吳子】

十有五年春二月天王使冢父來求車【有傳說在章指】三月乙未天王崩夏四月己巳□齊僖公五月鄭伯突出奔蔡奔君未無故者鄭忽嘗言故矣於是祭仲專鄭厲公與雍糾圖之祭仲殺雍糾而後奔則其但言奔何以是為自失國也春秋之法苟其道足以失國雖有權臣亦以自致之文書之是故鄭祭仲殺雍糾而突出衛孫林父殺子子伯子皮而衍出燕大夫殺外嬖而款出書奔而已矣

鄭世子忽復歸于鄭

忽嘗不稱世子此其加世子何從其恒稱也以其失國也不稱子以其歸國也稱世子春秋無加損焉正其名實而已矣不稱鄭伯以是為終失國也春秋無二尊苟失國雖見殺不書是故鄭無昭公晉無懷公【稱世子以正忽之反正以反突之不正】

許叔入于許

出罪也入亦罪也則悉書之【據鄭良霄宋魚石晉栾盈之類】出非其罪入罪也則但書入【據齊小白陽生莒去疾之類】凡入皆讞也凡入讞也則其曰許叔何以是為宜入也昔者齊鄭魯三師入許許莊公奔衛鄭人以許東偏奉許叔而使其大夫獲處許西偏許無君者十有五年忽突之亂於是叔始得許若許叔可謂能復莊公之字矣是故入未有書字者雖公子也弗謂公子此其曰許叔所以別有罪也叔不書字則疑于齊小白陽生莒去疾

公會齊侯于艾邾人牟人葛人來朝

朝未有书人者旅见非邦交之旧自参以上甚矣凡朝不胜讥莫甚于自参以上是故贬人之

秋九月郑伯突入于栢冬十有一月公會宋公卫侯陈侯于袤伐郑

纳厉公也會伐會盟會救會侵皆前定之辞也未前定则书會于某而后伐【宣元年棗林定四年召陵同】會于某而后盟【重丘】會于某而后救【牡丘】會于某而后侵前定同欲也未前定继事也【穀梁地而后伐疑辞也】

十有六年春正月公會宋公蔡侯卫侯于曹夏四月公會宋公卫侯陈侯蔡侯伐郑秋七月公至自伐郑始至伐也凡至危之也隱行不至桓至盟戎而已莊之适齐皆至之桓文有诸侯之事苟不得意则书至【桓至牡丘文至围许】讫于断道而后不至者鲜矣成之琐泽襄之鄙之戏之役仅不至焉耳昭定之世无不至者哀或不至至會吴伐齐至黄池之會皆危之也是故夫人不至至出姜大夫不至至季孙意如叔孙婁

冬城向十有一月卫侯朔出奔齐

此卫人立公子黔牟而后奔则其但书奔何以为自失国也春秋之法苟其道足以失国虽有篡公子亦以自致之文书之是故卫人立黔牟而朔出蔡人立东国而朱出邾人立君而朱儒出书奔而已矣春秋之初人犹有让心也鲁隱之奉其弟轨也宋穆之舍其子冯也卫伋壽之不爱其死以立朔也则皆让千乘之国者也俄而鲁宋弑祸起卫亦废置君焉而诸侯相与成三国之乱于是翬相鲁桓督相宋莊卫朔拒天子之师而自立春秋于是为乱臣贼子作也

十有七年春正月丙辰公會齐侯纪侯盟于黄二月丙午公會邾仪父盟于越夏五月丙午及齐师战于奚六月丁丑蔡侯封人卒秋八月蔡季自陈归于蔡

出罪也归亦罪也则悉书之【据陈黄楚比之类】出非其罪归罪也则但书归【据郑突曹赤之类】凡归皆讥也凡归皆讥则其曰蔡季何以是为宜归也蔡桓侯卒无子蔡人召季于陈而立之是故归未有称字者虽公子也弗谓公子此其曰蔡季所以别有罪也季不称字则疑于郑突曹赤

癸巳□蔡桓侯及宋人卫人伐邾冬十月朔日有食之【有传】

自文以上日食有不书日者自文而下皆书日是故曰桓莊之世多阙文

十有八年春王正月公會齐侯于泲公与夫人姜氏遂如齐夏四月丙子公薨于齐

内讳弑书薨不地其曰公薨于齐所以别弑也是故弑贼不讨不书□见杀于他邦虽讐不复书□【本穀梁】可以致春秋责臣子之□矣

丁酉公之丧至自齐秋七月冬十有二月己丑□我君桓公

见杀于他邦虽讐不复书□

春秋后传卷二
<经部, 春秋类, 陈氏春秋后传>
钦定四库全书
春秋后传卷三 宋 陈傅良 撰
庄公
元年春王正月三月夫人孙于齐【有传】

此文姜也曷不称姜氏绝之也吾君父不良死于齐而文姜犹孙于齐庄公不可以言人子矣绝文姜所以恶庄也
夏单伯送王姬

单伯者何天子之大夫也曷为书之如吾大夫唯王人则以内辞书之书会书如书至书卒【十四年单伯会伐宋文十四年单伯如齐十五年单伯至自齐文二年王子虎卒定四年刘卷卒】一如吾大夫内之也外送女不书【据传昭五年晋侯送女】此何以书吾主之也齐襄弑鲁桓天子不能正而使鲁主王姬以嫁齐则鲁岂无辞乎然则单伯何以无讥不及单伯也

秋筑王姬之馆于外【有穀梁传】
冬十月乙亥陈侯林卒王使荣叔来锡桓公命

王命诸侯不书【据鲁颂僖公使季孙行父请命于周他如庄十六年王命曲沃伯为晋侯庄二十七年召伯廖赐齐侯命之类】此何以书追命之也桓在位久曷为于是焉追命之桓弑其君兄而自立比其死也而后王赐之也桓公篡立周人以为罪矣而不能正宰渠伯纠来仍叔之子又来将以怀柔鲁也而终桓之身不请命盖鲁无王厯者十有五年而家父之后王聘亦不及鲁于是末如之何矣而追锡命是故王不书天【本何休】贬必于其重者莫重于追锡命故于是焉贬也【本薛氏昭七年传衞齐恶告丧于周且请命王使成简公如衞吊且追命襄公】桓王未葬则荣叔何以言使【据武氏子毛伯不言使】不可以三年无君

王姬归于齐

王姬不书【据传文公八年宋襄夫人】唯庄公之篇再书之曷为再书以庄公之于齐不可与相为礼也天子嫁女于诸侯使同姓诸侯主之则鲁有主王姬者矣莫悖于与齐婚是故特讥之春秋之书外女未有详于此者也书送女书筑王姬之馆书归书卒皆以病庄公也

齐师迁纪邢鄆郟
二年春王二月葬陈庄公夏公子庆父帅师伐于余丘秋七月齐王姬卒

外夫人卒不书【本公谷例】虽王后亦不书【据昭十五年穆后】此何以书以吾尝为之服也然则礼与记曰齐告王姬之丧鲁庄公为之大功或曰由鲁嫁故为之服姊妹

之服或曰外祖母也故为之服或之者疑之则礼未之有也礼未之有而以意起之施诸不共戴天之讎庄公不可以为人子矣

冬十有二月夫人姜氏會齐侯于禚【有传并谷梁传】乙酉宋公冯卒

三年春王正月溺會齐师伐衛【有传并穀梁传】

溺者何隐桓庄之世吾大夫會伐恒名之自公孙兹不贬矣【事在僖四年】

夏四月葬宋庄公五月葬桓王

會葬不书其人必有故也而后书其人文公使公子遂葬晋侯【六年】叔孙得臣葬襄王【九年】是均周晋也昭公使叔弓葬宋公【十一年】滕侯【三年】叔鞍葬景王【二十二年】是均周宋滕也均犹可也晋景公卒成公吊丧【据传十年晋侯卒公如晋晋人止公使送葬诸侯莫在鲁人辱之故不书讳之也】而定王不书葬【定王崩在五年】楚康王卒襄公送葬而灵王不书葬【据传二十八年十一月天王崩十二月公及诸侯如楚及汉康王卒二十九年四月葬楚康王公及诸侯送葬五月公至自楚葬灵王郑上卿有事子展使印段往伯有曰弱不可子展曰与其莫往弱不犹愈乎遂使印段如周杜氏葬灵王不书會不书】不臣于周而拙于晋楚春秋讳之是故春秋不徒志葬也

秋纪季以鄆入于齐

纪侯在而季以鄆入齐若以邑叛然则其称字何纪侯意也春秋之初齐襄小伯自桓之始年挟郑以图纪黄之會鲁为之求成不得免焉迁邢鄆鄆纪之不绝也如线季以鄆入齐纪于是乎始判是分国以与之也齐人之所欲者吾土地分国以与之苟可以免纪者无不为也是纪侯意也是故季称字【本公羊】不称字则疑于宗鱼石邾庶其

冬公次于滑

公行不言次必久而无名也而后言次吾君尝久外矣【闵元年召季友于陈公次于郎不书】而庄公特书次以庄之不竞于齐也君父死焉不能讨且會伐衛于是将谋纪难而齐卒灭纪斯可以言次矣是故鲁十有二公惟庄昭书次舍是无书次者矣外书次必伯者之所以兴衰也

四年春王二月夫人姜氏享齐侯于祝丘三月纪伯姬卒

内女为夫人书卒不书葬【本公羊穀梁外夫人不书葬】其不书卒者必有故也是故齐子叔姬不卒邾伯姬不卒以是为尝失位也非有故也而不卒者则不赴也【纪伯姬】

夏齐侯陈侯郑伯遇于垂

自参以上非邦交之旧矣

纪侯大去其国【有穀梁传】

诸侯去国恒书奔此其不书奔何不以奔罪加纪侯也其不以奔罪加纪侯何罪齐也黄之會鲁为之求成不得免焉迁邢鄆鄆纪之不绝如线也纪季以鄆入于齐犹不得免焉则有去而已矣去国如纪侯庶几有辞焉故不以奔罪加纪侯也然则何以罪齐书曰纪侯大去其国未知纪之自亡与人之亡之与曰齐侯葬纪伯姬则齐亡之也

六月乙丑齐侯葬纪伯姬

内女不葬必有故也而后书葬纪伯姬在殡齐人取其国而葬伯姬于是特书葬不以往

會也是故苟宜書葬雖不往會書之陳哀公在殯楚師滅陳輿嬖袁克葬之書曰葬陳哀公苟不宜書雖往會不書楚葬康王襄公及陳侯鄭伯許男送葬至于西門之外不書也達例永足以觀春秋矣

秋七月冬公及齊人狩于禚【有公羊傳】

五年春王正月夏夫人姜氏如齊師秋邠犁來來朝傳曰未王命也

冬公會齊人宋人陳人蔡人伐衛

此納衛侯朔也則其不言納何【據昭十二北燕伯】以朔入為重也入不書納是故伐鄭納突伐衛納朔書入而已矣凡會伐有諸侯在焉則其大夫稱人有諸侯在焉而大夫不稱人自齊國佐始

六年春王正月王人子突救衛

自伐鄭以來王師不書其書救衛何救衛無功也救衛無功而後王命益不行于天下是故子突貴者也而系諸人人子突所以微王室也【本公羊】救不書必救而無功然後書而書救自子突始隱桓之諸侯會盟侵伐徒以定篡弑也衛州吁之亂會者五國宋督之亂會者四國襄之會伐鄭以立突於是伐衛以立朔也以王子將而救衛救衛而克則是天子猶足廢置諸侯矣昔者王嘗以一軍命曲沃伯為晉侯詩人美之而經不書以為天子宜廢置諸侯也天子而猶得廢置諸侯春秋可以無作而朔終以自立故曰救衛無功而後王命益不行于天下

夏六月衛侯朔入于衛

歸君未有不復者【據僖二十八年衛侯鄭曹伯襄襄二十六年衛侯衎】歸不言復者未得國也是故鄭伯入于栢不言復衛侯入于夷儀不言復罪未得國也而不言復則非奔君也【據蔡侯廬陳侯吳】朔奔君也其不言復何朔害伋壽而後立衛人為之賦二子乘舟孔子取焉則其罪宜廢又拒天子之師故入不言復與齊小白陽生同文公羊氏曰篡辭也

秋公至自伐衛螟冬齊人來歸衛俘

七年春夫人姜氏會齊侯于防夏四月辛卯夜恒星不見夜中星隕如雨秋大水無麥苗【有公羊傳】冬夫人姜氏會齊侯于穀

八年春王正月師次于郎以俟陳人蔡人

此吾君將也【據傳公子慶父請公伐齊】何以稱師莊之會齊皆讞也莫甚于及圍郕是故一貶之師行不言次【成十六年我師次于督不書】必久而無功也而後言次吾師嘗久外矣而莊公特書次以莊之不競于齊也俟陳蔡不至及齊圍郕郕降于齊師以正月甲午治兵及秋而還斯可以言次矣

甲午治兵夏師及齊師圍郕郕降于齊師秋師還內書師未有詳于此者書次書俟書治兵書還皆特筆也師還不書書還危不得還也【杜還師還與言至之義同】

冬十有一月癸未齊無知弑其君諸兒

此公孫無知也其曰無知何隱桓莊之春秋凡賊皆名之弑君者連稱管至父則其專罪無知何君弑而無知受之則賊不在二子矣春秋誅利心是故連稱管至父實弑齊襄無知與聞故者也而無知受之則無知為逆首公子弃疾實弑楚靈比與聞故者也而比受

之则比为逆首苟以为利则万乘之国弑其君者必千乘之国千乘之国弑其君者必百乘之家此孟子所以深探其本而遏乱原也

九年春齐人杀无知

无知尝逾年则其曰齐人杀无知何是不成君之辞也向也州吁之弑衛人为之变不逾年卒讨之今也无知之弑齐人亦为之变逾年卒讨之是故无知不成君而雍廩得书人是国有臣子也春秋之初王道犹未坠人心犹止于礼义也卫诗为州吁作者七郑诗为叔段作者三为忽作者五齐诗为襄公作者六晋刺献公陈刺陈佗大抵隱桓庄之际皆有合于春秋以此攷见诸侯放恣而学士大夫清议之公廩廩然也以齐襄之不道诗人屡致意焉冀幸一悟而长恶不已至于遇弑然不忘讨贼之义故曰国犹有臣子也

公及齐大夫盟于薳

传曰齐无君也

夏公伐齐纳子纠

称子何成纠之为子也未逾年之君称子襄公弑国人讨无知纠自鲁入小白自莒入未知其谁立也成纠之为子则纠宜立者也纠宜立则夫子何以不予召忽予管仲成纠之为子可也成管仲之为臣则不可也然则鲁宜纳与凡纳所宜纳皆不书【据宋纳齐孝公秦纳晋文公之类】必不宜纳也而后书襄公吾讎也而纳其亡公子以为德是纳不宜纳也

齐小白入于齐秋七月丁酉葬齐襄公八月庚申及齐师战于干时我师败绩【穀梁有传】

内不言败绩【本公羊传】讳也此其书败绩何以为不足讳也狐骀之败鲁于是乎始鬻不书为襄公讳也曷为为襄公讳以鲁之救鄆之力索矣魏世子巫于晋犹无益于鄆而莒卒灭鄆于鲁何讥焉故讳之也于升陞书战不书败犹为僖公讳也曷为为僖公讳邾人灭须句为之伐邾取须句焉而反其君邾人来战是忿兵而已矣齐襄吾讎也而纳其亡公子以为德于是败焉是纳不宜纳也为公讳也是故战不言伐战而言伐败之若齐有辞焉则甚伐者也

九月齐人取子纠杀之

鲁杀纠也则其曰齐人取子纠杀之何罪小白也宋公使邾子用鄆子春秋舍宋而书邾以为皆国君也可以不受命矣而禀命于宋则邾为戎首【本杜预】鲁受命于齐而杀纠则其罪小白何春秋之法两下相杀不书虽世子也苟未嗣位杀之亦不书襄公弑国人讨无知纠自鲁入小白自莒入未知其谁立也小白得国而使鲍叔帅师临鲁以杀纠则是以千乘之国杀其兄焉耳讥不在鲁也

冬浚洙

十年春王正月公败齐师于长勺二月公侵宋三月宋人迁宿夏六月齐师宋师次于郎

其言次何以桓公之图伯而未集也外师未有书次者【据僖二十五年晋次阳樊宣十五年秦次辅氏之类】桓公所甚汲汲者鲁也苟不得鲁不可以合诸侯宿师于郎将以诎鲁尔而北杏之會不至鄆會不至则犹未得志于鲁也于是书次用见桓之未得志于诸侯也是故书齐师宋师次于郎以志齐伯之难书楚子蔡侯次于厥貉以志楚伯之难

于此焉可以知人心矣不苟于从齐是人心犹有周也不苟于从楚是人心犹有晋也有王者作天下归往之矣齐一变至于鲁鲁一变至于道孔子所以有志于鲁也

公败宋师于乘丘秋九月荆败蔡师于莘以蔡侯献舞归

外域交相败不书【据襄十三年楚败吴师十四年吴败楚师之类】中国败外域不书【据僖二年虢公败戎于桑田僖八年晋败狄于采桑之类】必败中国也而后书春秋为内外而作也荆败蔡师于莘是内侵之始也吴败顿胡沈蔡陈许之师于鸡父则诸夏之不亡者寡矣是故书荆自此始而春秋以吴终焉圣人之所甚惧也称荆本其旧号也

【小雅蛮荆商颂荆楚】齐桓公伯而敢于伐郑于是始书楚自會于邓诸侯惧楚矣而败邓不书败随不书败郟不书虽灭申灭邓灭息亦不书也败蔡师以蔡侯献舞归于是始书之是荆楚之日炽也春秋之法执君言以归灭国之君言以归徒败焉耳而言以归则是蔡服楚也是中夏之日衰也

冬十月齐师灭谭谭子奔莒

书灭始于此纪侯大去其国宋人迁宿未可以言灭必若齐桓而后可以言灭矣然则灭国自齐桓乎前乎此矣前乎此则曷为以首灭罪齐微桓公则灭国之祸不接迹于天下春秋之际灭国三十六五伯为之也诸侯失国恒名之则谭子何以不名凡奔非其罪不书奔非其罪莫甚于被兵者也是故齐鲁郑入许许男奔衛不书【隐十年】必国灭而后书国灭而后书奔者以不死社稷也奔非其罪莫甚于被兵者也虽不死社稷犹不名之也

十有一年春王正月夏五月戊寅公败宋师于鄆【传例说在章指】秋宋大水冬王姬归于齐

十有二年春王三月纪叔姬归于鄆

纪亡矣曷为谓之纪叔姬存纪也国灭而复见者善辞也【据昭八年楚灭陈十一年灭蔡十三年蔡侯庐陈侯吴归陈蔡】未始复也而再见春秋所以录灭国也是故纪亡矣书纪叔姬陈亡矣书陈灾

夏四月秋八月甲午宋万弑其君捷及其大夫仇牧此南宫万也其曰宋万何隐桓庄之春秋凡贼皆名之死君事必大臣然后书于是大宰督死焉则何以不书督弑君之贼也然则荡意诸死于昭公何以亦不书昭称人以弑则是君无道也已为大臣而君无道徒死焉耳不足录也

冬十月宋万出奔陈

向也合四国之君而后华督免于讨今万得奔陈自是无讨贼者矣虽然犹有仇牧也

十有三年春齐侯宋人陈人蔡人邾人會于北杏【穀梁有传】春秋非主兵皆序爵也【据宋齐卫盟瓦屋宋陈蔡盟折之类】于是序齐于宋之上而独爵齐将予齐以伯也晋文公之简曰晋侯齐师宋师秦师【据传宋公在师】皆始伯之辞也自是无特相會者矣

夏六月齐人灭遂秋七月冬公會齐侯盟于柯

十有四年春齐人陈人曹人伐宋夏单伯會伐宋此齐桓公以王师伐宋则其曰单伯會

伐宋何于是诸侯初用王师也春秋不以诸侯用王师故书曰齐人陈人曹人伐宋单伯會伐宋则不以诸侯用王师之辞也春秋之初王室犹甚威重也衛之定州吁也陈之妻郑忽也纪之求成于齐也皆欲假宠于王齐桓之兴亦必请王师而后专伐自伯者之令行天下诸侯不知有王矣

秋七月荆入蔡冬单伯會齐侯宋公卫侯郑伯于鄆十有五年春齐侯宋公陈侯卫侯郑伯會于鄆夏夫人姜氏如齐秋宋人齐人邾人伐郟【宋主兵也】郑人侵宋冬十月

十有六年春王正月夏宋人齐人衛人伐郑【宋主兵也】秋荆伐郑【说在十年荆败蔡师】冬十有二月會齐侯宋公陈侯衛侯郑伯许男滑伯滕子同盟于幽

诸侯初主盟也自是无特相盟者矣盟未有言同者于是言同盟以齐桓之初主盟也夫主盟者举天下而听于一邦也王者不作举天下而听于一邦古未之有也于是始书曰同盟同众辞也犹未予以专主是盟也再盟于幽之后天下知有齐桓而已矣内不言公讳之也

邾子克卒

向也曰邾仪父今也曰邾子已赐之爵也春秋之初诸侯犹禀命于天子大夫犹禀命于诸侯故滕侯称子薛侯称伯讫春秋不复焉而曲沃伯之为晋侯诗人之为赋无衣【据传王立晋哀侯立晋鄂侯又命曲沃伯为晋侯】则天子犹有黜陟也挟无骇终不书族则诸侯犹有予夺也春秋褒贬天下之君大夫而托鲁以寓王法莫备于隱桓庄之世是故于诸侯有细其爵者【据□伯卒称子】有虽爵而名之者【据邓谷】有字之者【据邾仪父】甚贬之者称人【据邾人葛人】于大夫有细其族者【据华督南宮万】有虽族但名之者【据鞌溺】有字之者【据宋孔父陈女叔】甚予之者称子【据季子高子】齐晋伯而褒贬在桓文矣或曰夫子何以进退天下之君大夫褒贬非春秋意也且书杞伯屡矣独来盟称杞子书公子友屡矣独来归书季子一人之身而进退称焉以是为非春秋之意则春秋徒异同而已矣

十有七年春齐人执郑詹夏齐人殲于遂【穀梁有传】

于是遂因氏颍氏工娄氏须遂氏飨齐戍而杀之则其但曰齐人殲于遂何不以咎遂人也桓公伯诸侯而丧师于亡国之余自取之也

秋郑詹自齐逃来

外逃不书【据宣十七年高固逃归襄十六年高厚逃归】逃来则书之书逃来讫与之接也苟不接虽莒仆来奔宣公命与之邑季文子使司寇出诸竟则不书苟接之矣介葛卢来僖公在會饋之刍米则书

冬多麋

十有八年春王三月日有食之夏公追戎于济西【有传】不言其来举重也举重之文约是故书公追戎于济西则戎来侵可知己书公會晋师于瓦则晋来救可知己【事在定八年】春秋无费辞费辞者必言故也公子结媵陈人之妇于鄆为盟齐宋书有事于太庙为卒仲遂书虽常事以其故不可不志也

秋有□冬十月

十有九年春王正月夏四月秋公子结媵陈人之妇于鄆遂及齐侯宋公盟【有公穀传】夫人姜氏如莒冬齐人宋人陈人伐我西鄙

二十年春王二月夫人姜氏如莒夏齐大灾秋七月冬齐人伐戎

二十有一年春王正月夏五月辛酉郑伯突卒秋七月戊戌夫人姜氏薨冬十有二月葬郑厉公

二十有二年春王正月肆大眚癸丑葬我小君文姜陈人杀其公子御寇【传言夫子作经改定】

杀非大夫公子皆不书【据传晋杀丕郑及七舆大天楚杀鬬宜申及仲归之类】公子为大夫则书曰大夫公子某非大夫也则书曰公子某虽大夫公子也以讨乱杀之则不书【据宋杀公子遂郑杀公子阍楚杀越椒之类】甚者杀世子母弟亦不书【据郑杀世子华宋杀母弟司城须】必杀之非其罪也而后书【本穀梁例称国以杀大夫杀无罪也】苟杀有罪则称人以杀【穀梁称人以杀杀有罪也】称人者讨辞也是故晋先都士穀箕郑父尝杀先克则称人陈公子过尝杀偃师则称人非杀有罪也而亦称人犹曰众之杀之焉耳

夏五月秋七月丙申及齐高傒盟于防【公羊有传】冬公如齐纳币【公羊穀梁有传】

二十有三年春公至自齐祭叔来聘

聘未有不称使者其不称使何私相为好也自桓之伯也王室无聘鲁者于是祭叔私相为好也自桓之中年则王室曷为无聘鲁者王命不行于天下庄僖崩葬盖不见于经矣是故春秋之初亟书王人书来求则犹有治不修贡之事焉书来锡命则犹有治不禀命之事焉于是祭公私相为好君子盖有感于此而非徒以为讥也庄僖之际诸侯来聘乎盟主矣

夏公如齐观社公至自齐

诸侯非享觐不逾境如齐观社非礼也

荆人来聘

聘未有书人者其称人何荆未有大夫也聘未有不称使者其不称使何荆未有君也荆未有君大夫也而称人于是始盖进之也【公羊始能聘也】隐桓之春秋舍王室若姻邻无聘鲁者矣【经止书天王齐】舍王室若姻邻未有聘鲁者而荆人先诸夏修聘于上国进之也进之也者忧之也

公及齐侯遇于穀萧叔朝公【穀梁有传】秋丹桓宫楹冬十有一月曹伯射姑卒十有二月甲寅公會齐侯盟于扈二十有四年春王三月刻桓宫桷【穀梁有传】葬曹庄公夏公如齐逆女【穀梁有传】

亲逆女不书【据庄十一年传齐侯来逆共姬】唯庄公特书之则以娶齐女也于是庄公生三十七年而在位二纪矣制于其母必齐女也而后娶齐人重要之为之亲纳币而观社遇于穀盟于扈一岁而三见于齐丹桓宫楹刻其桷以饰夫人夫人犹逾时然后入

大夫宗妇以币覲此何礼也是故书逆书至而后书入夫人未有言入者入难辞也书逆以病庄公也书入以恶哀姜也亦以讥齐桓也春秋之书夫人未有详于此者也

秋公至自齐

亲逆女不书惟庄公特书之则以娶齐女也

八月丁丑夫人姜氏入戊寅大夫宗妇覲用币大水冬戎侵曹曹羈出奔陈赤归于曹

凡君在丧恒称子其曰曹羈何不能为子也侵浅事也以千乘之国不能守不可以言子矣虽然奔君未有言故者言故犹愈于自奔也

郭公

二十有五年春陈侯使女叔来聘【有传】

诸侯初交聘也前乎此非王室若姻邻无聘者矣案是交聘齐桓公为之也自女叔之后诸侯之會数而朝聘皆之乎盟主矣是故吾君大夫如齐自僖之初年始春秋之初吾君大夫适他邦必有故也【据公如齐观社公如齐纳币公如齐逆女公子翬如齐逆女公子友如陈葬原仲公子结媵陈人之妇于鄆皆非朝聘】有故而后行犹私相为好而非定制也王室衰诸侯私相为好而无定制是谓乱初生也由僖而下朝聘皆之乎盟主天王狩于河阳公朝于王所天王使宰周公来聘公子遂如京师遂如晋吾未知其所终矣春秋所以作也

夏五月癸丑衛侯朔卒六月辛未朔日有食之鼓用牲于社伯姬归于杞秋大水鼓用牲于社于门冬公子友如陈

二十有六年春公伐戎夏公至自伐戎曹杀其大夫凡杀大夫恒名之此其不名何恶君也庄公卒有戎难羈出奔陈赤于是篡曹篡而杀其大夫则必不义其君者也宋杵臼之弑也始不书贼而曰宋人以是为君无道也无道而杀大夫则亦不义其君者也是故曹僖公之大夫不名宋昭公之大夫不名【僖二十五年宋成公杀其大夫无传】

秋公會宋人齐人伐徐

公會伐书人义同五年

冬十有二月癸亥朔日有食之

二十有七年春公會杞伯姬于洮【有传】夏六月公會齐侯宋公陈侯郑伯同盟于幽齐初主盟于是书公矣

秋公子友如陈葬原仲冬杞伯姬来【传例非是说在章指】

此吾女也则其书来何非归宁也凡吾之女称伯叔季时君之女加子以是知非归宁也内女为夫人凡八见于经未有书公會者而會自伯姬始由是来朝其子由是来求妇伯姬之为皆未之前闻也是故终伯姬之出但书来苟无辞以为称虽吾女亦以是书

莒庆来逆叔姬

外逆女不书【据宋蕩伯姬】此何以书公自主之也【穀梁接内是】诸侯嫁女乎大夫必使大夫同姓者主之曷为公亲焉则莒庆伉也莒无大夫于是书莒庆隐桓庄之际莒尝为强国入向取杞牟娄纳公子庆父吾君特會外大夫自浮来之盟始以是知庆之敢伉也【公羊氏传曰大夫越竟逆女非礼也则蕩氏宜书今不取】

杞伯来朝公會齐侯于城濮

二十有八年春王三月甲寅齐人伐衛衛人及齐人战衛人败绩

此齐侯也则其称人何贬之也于是王使召伯廖锡齐侯命且请伐衛以其立子頹也齐败衛师数之以王命取赂而还隐桓之春秋凡以王命讨诸侯皆不书至是始书之桓公不以王命讨衛也桓公不以王命讨衛而后王师不出向也王室有四方之事虽伐郑不服救衛无功而执芮伯立晋侯于是犹讨樊仲皮也自讨樊皮而王命不见于传记桓公为之也凡战不言伐战而言伐有不与战者也未始有不战者而亦言伐则甚伐者也曰衛人败绩不甚败之辞也

夏四月丁未邾子琐卒秋荆伐郑公會齐人宋人救郑齐桓也救必无功也而后书此其为无功何失郑也首止之會郑伯逃归为之围新城盟世子华而郑少师桓公卒郑遂朝楚诸夏之变于夷郑为乱阶也

冬筑郕【传例说在章指】大无麦禾臧孙辰告余于齐【谷梁有传】二十有九年春新延厯夏郑人侵许秋有蜚【传例说在章指隐元年】冬十有二月纪叔姬卒城诸及防【有传例】

三十年春王正月夏次于成秋七月齐人降鄣

次于滑也书公于郎贬师之此其但书次何以是为不足书也【本穀梁】甚矣庄之不竞于齐也君父死焉不能讨谋纪而齐灭纪及齐围郕而郕降于齐于是次成齐人降鄣【穀梁鄣纪之遗邑是左传有纪鄣】虽罪齐桓也讫庄公之身不可以不贬也

八月癸亥葬纪叔姬【公羊有传】九月庚午朔日有食之鼓用牲于社冬公及齐侯遇于鲁济齐人伐山戎【穀梁有传】三十有一年春筑台于郎夏四月薛伯卒筑台于薛六月齐侯来献戎捷秋筑台于秦冬不雨

三十有二年春城小穀夏宋公齐侯遇于梁丘秋七月癸巳公子牙卒【有公羊传】

季友以君命酖牙也则其书卒何丧以大夫之礼也牙将与庆父夫人为乱虽酖之而立叔孙氏使若死于位然是丧以大夫之礼也春秋之法苟有诛意于其臣虽自杀也亦书杀此杀也吾从而卒之则何以传信于万世不卒之则无以察鲁人之心也緣君臣之谊不得私其亲緣亲亲之恩不与国人虑兄弟也立叔孙氏使之若死于位然则淫人何惧焉史著其迹春秋察其心后世有惧焉者矣

八月癸亥公薨于路寢冬十月己未子般卒【有传】

君在丧恒称子【僖九年宋子定四年陈子之类】卒亦称子【文十八年子卒】若未葬也则卒称子某【子般襄三十一年子野】王在丧称王某卒称王子某【王猛王子猛】非君在丧而称子者必当国者也于是书卫子非王在丧而卒称王子某者亦必当国者也于是书王子虎【穀梁或云以其尝执重以守也】

公子庆父如齐狄伐邢

春秋后传卷三

钦定四库全书

春秋后传卷四

宋 陈傅良 撰 闵公

元年春王正月齐人救邢

书救邢溃而迁夷仪也

夏六月辛酉葬我君庄公秋八月公及齐侯盟于落姑季子来归【有传】

此公子友也其称季子何贤之斯不名之不名之斯以美称称之也季友酖牙以立般也而庆父卒贼般于是奔陈闵公立尚幼盟齐侯于落姑请复季友未知孰为之也庆父为之则闵公不弑以闵之见弑则非庆父之意而国人为之也国人之欲归季子以已乱也而季子虽归庆父夫人乱未已俄而弑闵公于是以僖公适邾则国人何贤乎季子微季子则庆父之篡成而庄公之统绝庆父之篡不成庄公之统不绝者季子在也是故奔陈不书如邾不书全季子也

冬齐仲孙来【有传】

书来讯也仲孙湫则齐之命大夫也其书来何是覘鲁也庄公薨子般弑而闵公幼落姑之盟尝以请于齐矣仅能复季子而已而庆父夫人之志未可知也桓公不能正憫然使人以覘鲁曰是可取乎桓公伯诸侯将因人之难以为利书来不书聘所以病齐桓也【赵子云病桓公而嘉仲孙】

二年春王正月齐人迁阳夏五月乙酉吉禘于庄公【有传】禘者何王者享其祖之所自出而以其祖配之也雍之颂曰禘太祖也周有二祖太祖文王也始祖稷也【太祖始祖文见仪礼】祖之所自出者尝也文王配帝于明堂稷配天于郊而尝禘于太庙东迁之后诸侯祖天子矣于是始有太庙则亦有禘【据传吴子壽梦卒临于周庙谓文王也衛蒯聩之禘曰皇祖文王烈祖康叔文祖襄公是谓三祖晋亳城北之盟亦曰先王先公则鲁衛晋皆祖文武郑祖厉王矣】鲁之郊禘惠公请之【本刘恕外纪】东周之僭礼也孔子曰鲁之郊禘非礼也周公其衰矣又曰禘自既灌而往者吾不欲观之矣入太庙每事问盖伤之也然则春秋何以始见于闵公闵公未除丧而亟行于庄公自是用之群公之庙【据传昭二十五年禘于襄公定八年禘于僖公之类】是故特书之以其不胜讥讥其甚者耳【余具郊语中】

秋八月辛丑公薨

鲁之春秋固书曰公子庆父弑公于武闾圣人修之曰公薨讳之也遇弑君父之大哀也则何忍言之是故书薨而不地且不葬薨十二公所同也不地不葬隐闵所独也然则虽讳而乱臣贼子之狱具矣

九月夫人姜氏孙于邾

文姜孙于齐绝不称姜氏此其称姜氏何文姜无妻道哀姜无母道是故文姜一见贬绝之哀姜再见而后贬绝也贬不于事端则必于其重者莫重于致庙则孙邾犹可言也

公子庆父出奔莒

闵薨不地且不葬乱臣贼子之狱具矣则曷为书庆父如他国庆父贼子般而弑闵鲁臣

子无讨焉则书庆父固如他臣也季友于贼般也奔陈于弑闵也适邾须庆父奔而后入立僖鲁之存仅焉耳是故宋万奔陈虽杀之不书庆父奔莒虽杀之不书春秋所以严佚贼之责也季子奔陈不书适邾不书全之也则其严佚贼之责何若季子可与言事存矣事亡则未也有季友在庆父将不免于为戮则曷为谓之无讨均之为佚贼也

冬齐高子来盟【穀梁有传】

来盟言使【据桓十四年郑语】此其不言使何贵之也凡外大夫不言使舍武氏子毛伯【王丧未命】皆私交也【据隐元年祭伯庄二十三年祭叔二十七年莒庆宣五年齐高固之类】非私交也而不言使则未始有大夫者书大夫【楚屈瑕】苟大夫也则不名皆贵之也贵之也者所以别私交也贵之则曷为不言使其谊有君命之所不及也十有二月狄入卫

于是衛及狄人战于荧泽衛师败绩遂灭衛则其但书入何不以累桓公也凡灭国有存之者则不言灭归德于存之者也有乘而取之者亦不言灭归罪于取之者也是故衛不言灭须句不言灭【事在僖二十一年】

郑弃其师【公羊有传】

于是高克奔陈不书不足书也是故以郑伯克段于鄆为义则太叔不书奔以天王出居于郑为义则王子带不书奔

春秋后传卷四

〈经部, 春秋类, 陈氏春秋后传〉

钦定四库全书

春秋后传卷五

宋 陈傅良 撰

僖公

元年春王正月齐师宋师曹师次于聂北救邢【有公羊传】救不言次言次无志于救也狄伐邢于是三歲矣桓公足以攘狄而宿师于聂北玩寇以待其弊邢溃奔师而后迁之是故凡救讥也言次甚讥之也

夏六月邢迁于夷仪

自迁不书【据文十三年邾迁于绎成六年晋迁于新田之类】有迁之者而后书由庄公而下以中国迁中国书曰某人迁某罪迁之者也由僖公而下以外域迁中国书曰某迁于某罪迁者也以齐晋之伯也而狄伐邢邢迁于夷仪狄围衛衛迁于帝丘虽外域之□横而桓文亦受其咎矣

齐师宋师曹师城邢【有公羊传】

此救邢之师也使之若再有事然志桓慢也狄伐邢于是三歲桓公足以攘狄而宿师于聂北玩寇以待其弊邢溃而后迁之桓公见义不勇矣

秋七月戊辰夫人姜氏薨于夷齐人以归【有传】楚人伐郑荆始书楚自是楚有事于诸侯皆称人

八月公會齐侯宋公郑伯曹伯邾人于柘九月公败邾师于偃冬十月壬午公子友帅师败莒师于郚获莒挈【有公羊传】

获非卿帅不书【据囚宋华元获乐吕但书华元获齐国书公孙夏但书国书之类】莒挈非卿也则何以书嘉季子也庆父弑君之贼也莒人纳焉赂而后归之鲁于是败其师获挈而鲁之内难始定

十有二月丁巳夫人氏之丧至自齐【有公羊传】

二年春王正月城楚丘【有公羊穀梁传】

于是诸侯城楚丘而封衛则其以鲁辞书之但曰城楚丘何不以累桓公也诸侯之义不得专封不以专封衛累桓公也以鲁辞书之使之若诸侯同欲然上无明天子下无方伯诸侯有灭亡者夫人而欲救存之则先王之泽天下之公义也序绩莫如公齐桓存三亡国必若救衛庶几于公矣是故衛不言灭庐于曹也不言迁齐侯使公子无亏帅车三百乘甲士三千人戍曹不言救春秋之辞约而不迫者善辞也

夏五月辛巳□我小君哀姜虞师晋师灭下阳【有传并公羊谷梁传】

晋里克荀息也称师何灭未尝书大夫将也下阳虢邑也灭下阳而后灭虢则其但书灭下阳何以为晋人之罪徒灭其邑焉尔而虢自亡也

秋九月齐侯宋公江人黄人盟于贯冬十月不雨楚人侵郑

三年春王正月不雨夏四月不雨【有传】徐人取舒六月雨秋齐侯宋公江人黄人會于阳穀冬公子友如齐涖盟【有公羊传】楚人伐郑

四年春王正月公會齐侯宋公陈侯衛侯郑伯许男曹伯侵蔡蔡溃

但言溃自溃也【昭二十九年郟溃】伐溃伐者溃之也【成九年楚师伐莒莒溃】苟亡矣自溃不足道也【僖十九年梁溃】苟灭之矣溃之不足道也【宣十二年萧溃襄二十九年舒鸠溃】晋伐 咎如 咎如溃不书传曰上失民也言不徒罪晋也此桓公侵蔡也则其书溃何侵浅事也侵蔡而蔡溃焉尔薄齐之罪也

遂伐楚

春秋举重凡师再有事不悉书【据成六年晋栾书救郑遂侵蔡但书救郑八年晋栾书侵蔡遂侵楚侵沈但书侵蔡之类】苟悉书也则以遂言之兵事言遂必關天下之大故也自入春秋楚浸强矣而不见于经败蔡师以蔡侯献舞归圣人惧焉而诸夏之交兵非以定篡弑则修怨而已矣问不及楚也桓公始有志于夷夏之分于是伐楚而以侵蔡召诸侯书曰遂伐楚言志不在蔡也侵蔡遂伐楚以志齐桓之伯侵陈遂侵宋以志楚庄之伯足以见夷夏之盛衰矣

次于陔夏许男新臣卒楚屈完来盟于师盟于召陵【书屈完有穀梁传】

凡次讥也此齐桓之师则其书次何用见桓之不战而诎楚也桓公合九国之众以讨楚兵未有盛于此者也楚虽强足以一战矣而临楚不战楚人为之诎使其大夫即盟于师桓公不欲临楚盟屈完退而盟召陵不阻隘不以君违臣不以军容乱国容一动而三善得桓公不但以力服人矣春秋之褒贬辞不足以尽意而后见于文书曰次于陞楚屈完来盟于师盟于召陵斯其为文也美矣则从其恒辞书次可也

齐人执陈轅涛涂【有公羊传】

此齐侯也其称齐人何贬也东迁之后诸侯始放春秋之治在诸侯而大夫不与北杏之后盟主始专春秋之治在盟主而诸侯不与治在诸侯贬人之是故于中丘會称君伐宋称人于郎战称君盟恶曹称人治在盟主贬人之是故于陞伐称君于执涛涂称人于温會称君于执衛侯称人

秋及江人黄人伐陈八月公至自伐楚□许穆公凡诸侯卒于他国称国【昭二十二年蔡侯襄二十六年许男】非国也则但称地【晋侯于扈宋公于曲棘】有诸侯之事焉则以其事卒之【曹伯于师□伯于会】此其不言卒于师何以其在桓师犹在国也于是葬之以侯礼加二等【穀梁内桓师也】

冬十有二月公孙兹帅师會齐人宋人衛人郑人许人曹人侵陈

會侵未有书帅师者而公孙兹书帅师會救未有书帅师者而公孙敖书帅师公子牙与弑子般公子庆父谋弑闵公而兹与敖皆世为将是故谨志之曰子友帅师败莒师于郚公孙兹帅师會侵陈公孙敖帅师及诸侯之大夫救徐见三家之所从始也

五年春晋侯杀其世子申生【三传同公羊穀梁直称君例】

于是太子缙于新城则其斥杀何春秋之法苟有谗而不见则其君之罪也是故申生以驪姬之譖自杀宋世子痤以伊戾之譖自杀直称君杀而已矣

□伯姬来朝其子【穀梁有传】夏公孙兹如牟公及齐侯宋公陈侯衛侯郑伯许男曹伯會王世子于首止【有传】

诸侯何以會王世子定世子也于是子带有宠于惠后世子危不得立桓公率天下之诸侯以會之世子危不得立而为會以定之礼之变者也然则如之何而可殊會世子而不以世子夷于诸侯不以世子夷于诸侯所以定世子也桓公可谓善处父子之闲矣

秋八月诸侯盟于首止【公羊前目后凡例】

會而后盟闲有事书诸侯盟于某【事在襄十九年祝柯二十五年重丘】非闲有事也亦书诸侯盟于某则有不盟者也此其言诸侯则王世子不与盟也桓有诸侯之事三于洮序王人于诸侯之上而同盟焉王人微者也虽同盟而无嫌于葵丘亦序周公于诸侯之上而不敢同盟焉天子之宰异于微者也盟于首止不但不同盟也而帅诸侯以殊會世子以世子之尊非特天子之宰比也桓公于是知节矣是故會有周人盟无周人书會于某某日诸侯盟则齐桓之遜也會有周人盟有周人书會于某但曰某日盟则晋厉之伉也春秋于是予桓也【事在成十七年柯陵】

郑伯逃归不盟

国君而曰逃贱之也何贱乎郑伯以其背夏盟也厥貉之會麋子逃归不书【事在文十年】厉之役郑伯逃归不书【事在宣十一年】盖逃楚也必若郑文公逃齐陈哀公逃晋而后书所以示夷夏之辨严矣

楚人灭□□子奔黄

楚尝有大夫屈完此鬪穀于菟也则其称人何楚大夫将恒称人也

九月戊申朔日有食之冬晋人执虞公【有传公羊曰不与灭也】晋灭虞矣则其但书执何以为晋人之罪徒执其君焉耳而虞自亡也是故灭者亡国之善辞也上下同力也苟同力致灭自其君世子必详所以灭之之罪书曰楚子虔诱蔡侯般杀之于申楚公子弃疾帅师围蔡楚师灭蔡执蔡世子有以归用之苟不同力执其君而国从之矣则不详所以灭之之罪书曰晋人执虞公以为晋人徒执其君焉耳而虞自亡也

六年春王正月夏公會齐侯宋公陈侯衛侯曹伯伐郑围新城

伐国不言围邑【本穀梁例】此其言围何以桓公合六国之众徒围其邑焉耳自僖而下必围国而后书邑不足书也

秋楚人围许

此楚子也其称人何楚君将恒称人也

诸侯遂救许

于是蔡穆侯将许僖公以见楚子于武城许男面缚衔璧大夫衰经士舆榦此所以书救许也

冬公至自伐郑

七年春齐人伐郑夏小邾子来朝郑杀其大夫申侯秋七月公會齐侯宋公陈世子款郑世子华盟于□母曹伯班卒公子友如齐冬葬曹昭公

八年春王正月公會王人齐侯宋公衛侯许男曹伯陈世子款盟于洮

王人者何微者也序微者于诸侯之上虽同盟无讥焉耳

郑伯乞盟夏狄伐晋秋七月禘于太庙用致夫人【有传】此哀姜也曷不称姜氏绝之也哀姜得罪于吾君而犹致于庙绝哀姜所以恶僖公也向曰夫人氏而不言姜见绝于其国之辞也今曰夫人而不言氏见绝于宗庙之辞也是故鲁禘非礼也虽用之群公之庙不书【据禘于襄公禘于僖公之类】有用之群公之庙书者矣但曰有事讥不在用禘也【事在昭十五年】必禘于太庙致哀姜也而后书讥在用禘也

冬十有二月丁未天王崩

九年春王正月丁丑宋公御说卒【传例非是说在章指】夏公會宰周公齐侯宋子衛侯郑伯许男曹伯于葵丘

天子之三公也桓尝殊會王世子则其不殊會三公何春秋是以予桓也春秋之予桓奈何桓之會有天子之事三于洮序王人于诸侯之上而同盟焉于葵丘亦序周公于诸侯之上而不敢同盟焉盟于首止不但不同盟也而帅诸侯以會世子桓知节矣春秋是以予桓也

秋七月乙酉伯姬卒九月戊辰诸侯盟于葵丘

此其言诸侯则宰周公不盟也

甲子晋侯侏卒冬晋里克杀其君之子奚齐【有传】遇弑虽未逾年称君【据齐舍】此其称君之子何献公杀申生绌重耳夷吾而立其嬖子晋之乱献公为之也是故奚齐不称君而称君之子

十年春王正月公如齐狄灭温温子奔衛晋里克弑其君卓及其大夫荀息【有公羊传】夏齐侯许男伐北戎晋杀其大夫里克【公羊惠公之大夫也】

讨贼不言大夫其曰晋杀大夫里克何克犹在位也克犹在位则是杀大夫耳在位独里克乎督相宋庄翬相鲁桓前乎此矣于是里克杀以他故而后见焉耳自宋万而下弑君无讨者凡贼再见犹夫人也虽若晋里克衛□喜杀以他故而后见书曰大夫则犹夫人而已矣是故自里克迄春秋贼皆书氏族乱臣贼子无以异于夫人矣通国以为贼吾从而志之以为贼通国以为夫人我从而志之以为夫人我何加损焉实录而已是经之大变也虽然有荀息在焉则犹有臣子也【杜自庄以上诸弑君者皆不书氏自闵以下诸弑君者皆书氏明时史之异同非仲尼所成也非是】

秋七月冬大雨雪

十有一年春晋杀其大夫平郑父夏公及夫人姜氏會齐侯于阳穀秋八月大雩冬楚人伐黄

十有二年春王三月庚午日有食之夏楚人灭黄灭不言伐此其书伐何病桓公也以阳穀之會贯之盟徒以亡其国焉耳

秋七月冬十有二月丁丑陈侯杵臼卒

十有三年春狄侵衛夏四月□陈宣公公會齐侯宋公陈侯衛侯郑伯许男曹伯于咸秋九月大雩冬公子友如齐

十有四年春诸侯城緣陵【有传并穀梁传】

诸侯不序必前目而后凡也非前目而后凡也而不序者散辞也【本穀梁及范□】是故但曰诸侯者不系之伯者之辞也但曰大夫者不系之君之辞也【溴梁】

夏六月季姬及鄆子遇于防使鄆子来朝

朝未有言使者则其曰季姬使鄆子来朝何恶鲁而贱鄆子也于是季姬来宁公以鄆子之不来朝也怒止之遂遇于防使朝焉鲁为已汰鄆为已卑矣于妇人乎何讥恶鲁而贱鄆子也

秋八月辛卯沙鹿崩【有公羊传】狄侵郑冬蔡侯□卒

十有五年春王正月公如齐楚人伐徐三月公會齐侯宋公陈侯衛侯郑伯许男曹伯盟于牡丘遂次于匡救不言次言次无志于救也楚伐徐桓公合七国之众以救之而使大夫□有诸侯在而大夫□于是始桓公为之也则桓志荒矣而卒不竞于楚是故凡救讥也言次甚讥之也有诸侯在而使大夫□始于牡丘桓公为之也有诸侯在而使大夫盟始于鸡泽悼公为之也

公孙敖帅师及诸侯之大夫救徐

书救徐何徐卒败于楚也。會救未有书帅师者其称帅师何公子庆父弑闵者也而敖世为□是故谨志之曰公孙帅师见三家之所从始也

夏五月日有食之【有传】秋七月齐师曹师伐厉八月螽九月公至自會季姬归于鄆

内女嫁恒书归不书归必有故也季姬来宁公怒而止之故不书归至是而后言归也
己卯晦震夷伯之庙【谷梁有传】冬宋人伐曹
诸夏之相加兵自莊公之十九年始前此未之有也于是再见宋襄公为之也
楚人败徐于娄林

外域交相败不书【据传襄十三年楚人败吴师获公子党十四年楚伐吴吴人败之获公子宜穀之类】必败中国而后书徐戎也何以书病齐也齐帅天下之诸侯以攘荆楚存中国也楚伐徐桓公合七国之众盟于牡丘次于匡以救徐为之伐厉而徐卒败于楚人不数年宋楚争盟执宋公以是为盟主病矣

十有一月壬戌晋侯及秦伯战于韩获晋侯

于是秦获晋侯以归则其不曰以归何罪晋侯也获匹夫之辞也言获则以归不足言也是故获夷狄不书【据传郤缺获白狄子叔孙得臣获长狄】夷狄交相获不书【据传楚获吴公子党吴获楚公子宜穀】皆不足书也必大国也□尊而师众若宋华元齐国书斯可以言获也宋大国也□尊而师众获之若匹夫然犹曰宋齐之耻晋甸侯也而言获是夷晋侯于大夫也

十有六年春王正月戊申朔陨石于宋五是月六鷁退飞过宋都【有公羊传】三月壬申公子季友卒

大夫卒恒称名则其兼字之何见三桓之所自始也自是季氏世为卿也故讥之【本刘氏】

夏四月丙申鄆季姬卒秋七月甲子公孙兹卒冬十有二月公會齐侯宋公陈侯衛侯郑伯许男邢侯曹伯于淮

十有七年春齐人徐人伐英氏夏灭项

于是公犹在齐非公命也向也费伯帅师城郎非公命不书此何以书城郎常事灭项非常也是故必常事也讥不及公则不书苟非常则谨书之书灭项失兵权之渐也襄公在晋书邾庶其来奔昭公在晋书莒牟夷来奔虽非公命皆非常也春秋之季大夫不禀命于诸侯非但鲁也郑伯會于夷仪郑公孙舍之帅师入陈【事在襄二十五年】蔡侯會于召陵蔡公孙姓帅师灭沈春秋必谨而志之也

秋夫人姜氏會齐侯于卞九月公至自會【有传】冬十有二月乙亥齐侯小白卒十有八年春王正月宋公曹伯衛人邾人伐齐夏师救齐

书救齐何齐卒败于宋也

五月戊寅宋师及齐师战于甗齐师败绩

此宋公也其称帅何于是齐桓公与管仲属孝公于宋襄公以为太子而桓公卒寺人貂

立公子无亏孝公奔宋襄公以诸侯之师伐齐立孝公而还春秋贵义不贵惠尚治不尚功托人之孤而动天下之兵至于交战是伐丧而已矣虽然孝公不言纳孝公言纳则疑于齐纠邾捷菑宋襄之义仅异于鲁莊晋赵盾而已

狄救齐秋八月丁亥□齐桓公冬邢人狄人伐衛狄始称人【本穀梁】

十有九年春王三月宋人执滕子婴齐

执不言归未失国之辞也【据成九年郑伯襄十六年莒子邾子十九年邾子哀四年小邾子】言归危不得归也是故执君不名归然后名之执称曹伯归称曹伯襄执称衛侯归称衛侯郑此执也则其名何遂失国也舍滕子婴齐戎蛮子赤则皆未失国者也虞公失国则其不名何也虞自亡矣晋人之罪徒执其君焉尔不于执焉加以遂失国之辞所以见虞之自亡也【嬰齐遂失国本孙氏】

夏六月宋公曹人邾人盟于曹南

邾文公在焉则其称人何人曹邾以贬宋也属辞疑于北杏曷为谓之贬以明年鹿上之盟亦人宋则未尝予宋以伯也襄公欲合诸侯而执滕宣公使邾文公用鄫子一會而虐二国之君而亟与楚盟是丧师亡身之道也

鄫子會盟于邾己酉邾人执鄫子用之【说见齐杀子纠】秋宋人围曹

此宋公也其称人何凡围国虽君将贬人之前年齐桓卒宋公欲合诸侯而亟修怨于曹诸夏之书围国自此始

衛人伐邢冬會陈人蔡人楚人郑人盟于齐

楚初与诸夏盟也内不言公讳之也齐桓卒陈非盟主也则曷为會陈人春秋不以外域會中国则推而属之陈也楚称人犹未有君也以其人楚不可不人陈蔡以其人陈蔡不可不没公也【据传陈穆公】

梁亡【有传及穀梁传】

二十年春新作南门【有传例】夏鄫子来朝五月乙巳西宫灾郑人入滑

此郑公子士泄也不书大夫将恒称人也

秋齐人狄人盟于邢冬楚人伐随

二十有一年春狄侵衛宋人齐人楚人盟于鹿上人自为盟于恶曹见之于是再见其再见何中国无伯也齐故伯也桓卒宋襄公欲继之伯而求诸侯于楚楚于是争长于宋则是盟也莫适为主人自为盟而已矣

夏大旱秋宋公楚子陈侯蔡侯郑伯许男曹伯會于孟执宋公以伐宋

宋楚初争长也是故楚称子而序于陈蔡郑许曹之上不知诸侯之从楚与从宋与不予宋以伯也凡执恒称人执之于伐则伐称君执称人【据齐人执陈轅涛涂之类】于會則會称君执称人【据晋执衛侯之类】虽大夫也则亦會称大夫执称人【据韩不信执宋仲几】执不称人执有罪也此楚子执宋公则曷为不再言楚人不以荆楚执诸夏之辞也是故执宋公不申言楚人执齐庆封亦不申言楚人犹曰诸侯执之焉尔

冬公伐邾楚人使宜申来献捷

君使大夫何以特称人贬之也孟會称子矣献捷于鲁何以贬人之孟會不称子无以见

楚宋之争长献捷于鲁不人之则是遂予楚也自是至椒之聘而后始有君大夫于以见春秋之许夷狄也

十有二月癸丑公會诸侯盟于薄释宋公

外释不志【本穀梁传例据传僖二十八年以專释衛侯但书归】此何以志以宋公为无归道也是故执不言归者善辞也言归危辞也不言归言释直释之尔无归道也向也楚初与盟不书公于是书公不予楚以专释之辞也【本穀梁】

二十有二年春公伐邾取须句

春秋严义利之辨苟以为利一以取书之是故虽邾人灭须句须句子来奔伐邾取须句反其君焉书取须句虽莒著丘公立而不抚鄆鄆叛而来书取鄆

夏宋公衛侯许男滕子伐郑秋八月丁未及邾人战于升陞冬十有一月己巳朔宋公及楚人战于□宋师败绩【有穀梁传】

楚尝有君矣此楚子也其称人何楚君将犹称人也

二十有三年春齐侯伐宋围缙夏五月庚寅宋公兹父卒秋楚人伐陈

此成得臣也不书楚大夫将犹称人也

冬十有一月□子卒【有传凡例非是说在章指】

二十有四年春王正月夏狄伐郑秋七月冬天王出居于郑【有传】

王出不书为尊尊讳也【据莊二十年惠王处拆定六年敬王处姑莠】其言出居于郑何以为无足讳焉耳子頹之难惠王未有过也郑驍图之执燕仲父杀子頹逾年而复辟故讳之也襄王以狄伐郑富辰諫弗听又德狄以狄女为后諫弗听子带以狄师攻王王御士将御之又弗听于是适郑书曰天王出居于郑以为无足讳焉耳虽然犹未书入也春秋善复正言入未足以言复正也襄王书出矣已而书王许书灭矣【事在定六年】已而书许男【事在哀元年】必如是而后可以言复正也

晋侯夷吾卒

二十有五年春王正月丙午衛侯毀灭邢【三传同】夏四月癸酉衛侯毀卒宋荡伯姬来逆妇【本刘氏】

公自主之也

宋杀其大夫【无传缺】秋楚人围陈纳顿子于顿

出罪也纳之者亦罪也则悉书之【据北燕伯款衛世子蒯聩】出非其罪纳之者罪也则但书纳齐桓公卒楚始与诸夏盟于齐盟于鹿上执宋公纳顿子侈然欲废置诸侯矣春秋之所惧也

葬衛文公冬十有二月癸亥公會衛子莒庆盟于洮【有穀梁传】

二十有六年春王正月己未公會莒子衛□速盟于向齐人侵我西鄙公追齐师至鄆弗及

此齐侯也其称人何自隱以来以兵加我君大夫将皆书人君将书君自文十五年齐懿公始大夫将书大夫自襄十七年齐高厚始迄春秋惟莒邾书人

夏齐人伐我北鄙衛人伐齐公子遂如楚乞师

乞师不书【据成二年臧宣叔如晋乞师】乞诸荆蛮然后书外乞师亦不书必盟主也而后书乞卑辞也乞诸荆蛮然后书志中国之诎于荆蛮也

秋楚人灭夔以夔子归

灭同姓名此楚子也则其不名何楚子之名未登于春秋也楚自武王始见于传文王始见于经犹以州举也至成王而后书楚人孟之會尝书楚子矣而复人之之名非遇弑未登于春秋则灭夔固不名也灭夔名之则疑于衛侯毀不名楚子则不名夔子也

冬楚人伐宋围緡公以楚师伐齐取穀【传例说在章指】公至自伐齐

二十有七年春□子来朝【有传】夏六月庚寅齐侯昭卒秋八月乙未葬齐孝公乙巳公子遂帅师入□冬楚人陈侯蔡侯郑伯许男围宋【有穀梁传】

楚尝有君矣【据會于孟】此楚子也【据传】则其称人何嫌予楚以伯也盟于齐楚犹序陈蔡之下于鹿上犹不先齐宋也孟之會宋楚始并为诸侯长矣楚之称子而长于诸侯宋襄公为之也鲁僖衛文夫子之删诗有取焉桓公卒而衛从楚鲁又从楚楚败宋于□纳顿子灭夔取齐之穀且合四国之君以围宋春秋以是为夷狄之强而已矣虽序于诸侯之上而特人之不称人则疑于庄王

十有二月甲戌公會诸侯盟于宋

二十有八年春晋侯侵曹晋侯伐衛公子买戍衛不卒戍刺之楚人救衛

楚尝救郑矣不书【见传僖六年二十二年】于是始书以为晋文之伯楚欲救而不能也

三月丙午晋侯入曹执曹伯畀宋人

入虽君将贬人之此其称晋侯何必若晋文入曹而后可以无贬也

夏四月己巳晋侯齐师宋师秦师及楚人战于城濮楚师败绩

此宋公齐国归父秦小子憖也宋公也则何以但称师尊晋侯也尊晋者予晋以伯也楚得臣何以称人楚未有大夫将也

楚杀其大夫得臣

于是楚子使止子玉曰母死不及则其斥杀何春秋之法苟有诛意于其臣虽自杀也书杀是故楚得臣公子侧皆书杀而已矣

衛侯出奔楚五月癸丑公會晋侯齐侯宋公蔡侯郑伯衛子莒子盟于践土

序晋侯于齐侯宋公之上予晋以伯也于是王子虎实盟诸侯则其不书何凡王人涖盟不书【据宣七年王叔桓公】涖伐不书【据文三年王叔桓公成十三年刘康公成肃公】

陈侯如會公朝于王所【有穀梁传】

此践土之诸侯也外朝王不书【据隐六年郑伯八年齐郑莊十八年晋虢】书鲁以见其余也于是晋侯将盟于践土而王即命为方伯诸侯朝焉则先朝而后盟曷为先书盟后书朝书朝而后盟是以天子与斯盟也书盟而后朝春秋不以天子与斯盟之辞也【穀梁诂會天王也】

六月衛侯郑自楚复归于衛

君归不言自必大夫也而后言自人臣无专归之道也君而言自者危不得归也是故晋文实复衛侯而曰自楚危自楚也晋厉实归曹伯而曰自京师危自京师也

衛元咺出奔晋陈侯款卒秋□伯姬来

义见庄二十七年

公子遂如齐冬公會晋侯齐侯宋公蔡侯郑伯陈子莒子邾子秦人于温天王狩于河阳【有传】

王狩不书【本公羊传据庄二十一年王巡守虢】此何以书非狩也于是晋侯將會于温召王以诸侯见而以狩书也王有事讥不在诸侯则以自致之文书之此晋侯之罪尔则曷为以自狩为文为尊尊讳也晋侯將會于温召王以诸侯见则先狩而后會曷为先书會后书狩书狩而后會是以天子与斯會也先书會后书狩春秋不以天子与斯會之辞也【穀梁讳會天王也】

壬申公朝于王所【有穀梁传】

朝践土不系日此系日何见先狩而后朝也王尝至践土而不言狩则王意也至温非王意也至践土王意也则可以但言朝至温非王意也则不可以但言朝故书曰天王狩于河阳壬申公朝于王所朝而系日虽讳而诸侯致天子之实见矣齐桓公盟王人不盟宰周公殊會世子晋文公实致天子而朝之故曰齐桓公正而不谄晋文公谄而不正

晋人执衛侯归之于京师

于是命晋侯为伯矣执衛侯是伯讨也则其称人何非王命也樊皮叛王王命虢公讨之虢公入樊执樊仲皮归于京师不书是故凡执讥也春秋犹以当乎罪不当乎罪为褒贬苟当乎罪虽晋厉公执曹伯得为伯讨苟不当乎罪虽齐桓执陈轅涛涂称人而已矣

衛元咺自晋复归于衛

归大夫不言复必诸侯也而后言复君有归道也大夫言复者伉也是故元咺复归宋鱼石晋栾盈复入皆伉辞也

诸侯遂围许曹伯襄复归于曹

执君不言归言归危不得归也

遂會诸侯围许

二十有九年春介葛卢来

介东夷也宜书来者也昔者衛侯来會惠公葬隐公不见不书今公犹在會亦不见介人则何以书介东夷也未通于上国一岁再至其意将安在乎故亟书之介人侵萧讥有以来之也

公至自围许夏六月會王人晋人宋人齐人陈人蔡人秦人盟于翟泉【有传】

此晋狐偃宋公孙固齐国归父陈轅涛涂也曷为不序晋初以大夫盟王子也向也践土之役王子虎不书涖盟也今以大夫盟王子文公之志荒矣大夫之交政于是始文公为之也不斥言王子虎为尊尊讳也以其人王子虎不可不徧人诸侯之大夫以其徧人诸

侯之大夫不可不没公也是故齐初主盟不言公【莊十六年盟齐】楚向与盟不言公【僖十九年盟齐】晋大夫初會盟不言公皆讥不在鲁也

秋大雨雹冬介葛卢来

春秋以一字为褒贬于介乎何费辞也春秋虽以一字为褒贬而或费辞者详始以著末也三月癸酉大雨震电庚辰大雨雪正月己卯烝夏五月丁丑烝将著其末不可不详其始也

三十年春王正月夏狄侵齐秋衛杀其大夫元咺及公子瑕衛侯郑归于衛

向也言复归今归不言复何奔失国之辞也执未失国之辞也凡执不言归【成九年郑伯襄十六年莒子邾子十九年邾子】执而言归危不得归也是故执君不名归然后名之执书衛侯归书衛侯郑执书曹伯归书曹伯襄名之者亦失国之辞也

晋人秦人围郑

此晋侯秦伯也曷为贬称人晋帅天下之诸侯以攘戎狄存中国也而围郑郑未有罪焉尔于是秦伯私与郑盟戍郑而去之子犯请击秦晋侯曰微夫人之力不及此吾其还也盖秦晋之怨自此始

介人侵萧冬天王使宰周公来聘公子遂如京师遂如晋

自桓王以下王室无聘鲁者于是再聘而宰周公实来则已尊矣公子遂如京师遂如晋以其如京师不敢不如晋是夷周于晋也吾大夫如京师不书【据鲁颂季孙行父】于是始书之聘周非常事矣

三十有一年春取济西田公子遂如晋夏四月四卜郊不从乃免牲犹三望【有传公羊传】

诸侯之有郊禘东迁之僭礼也故曰秦襄公始列于诸侯作西時祠白帝僭端见矣位在藩臣而膺于郊祀君子惧焉则平王以前未有也鲁之郊禘惠公请之也【据邵氏经世书惠公止于秦襄公祠白帝之年】齐桓公欲封禘而晋亦郊鯨皆僭礼也然则春秋何以始见于僖公向者莊公之观齐社也曹刿諫曰天子祀上帝诸侯會之受命焉诸侯祀先王先公卿大夫佐之受事焉用见惠公虽请之而鲁郊犹未率为常也僖公始作颂以郊为夸焉于是四卜不从犹三望是故特书之以其不胜讥讥其甚焉者尔【记礼者以为鲁礼皆成王赐之以康周公案衛祝之言曰周公相王室以尹天下于周为睦分鲁以大路大旗夏后氏之璜封父之繁弱殷民六族以昭周公之德分之土田陪敦祝宗卜史备物典策官司彝器则成王命鲁不过如此隐公考仲子之宫问羽数于众仲周公阅来聘飨有昌歜白黑彤盐周公以为备物辞不敢受衛武子来聘宴之赋湛露及彤弓武子不荅赋曰诸侯朝正于王于是乎赋湛露诸侯敌王所忤而献其功于是乎赐之彤弓陪臣其敢于大礼以自取戾假如明堂位之言得用郊禘兼四代服器官祝不应不及况鲁行天子之礼久矣则羽数何以始问于隐公昌歜彤盐以之飨天子之上公安用固辞湛露彤弓武子何以不荅且致讥焉于以见鲁僭未久上自天子之宰至于兄弟之国之卿苟有识者皆云鲁逊谢而鲁人并无一语及于成王之赐以自解用郊禘之说当从刘恕太史公博极群书定以为僭郊礼始于秦襄而恕亦该洽侷自史角之事之外有传记与明堂位之礼合则外纪岂独遗佚乎】

秋七月冬伯姬来求妇狄围衛十有二月衛迁于帝丘

三十有二年春王正月夏四月己丑郑伯捷卒衛人侵狄秋衛人及狄盟冬十有二月己卯晋侯重耳卒三十有三年春王二月秦人入滑齐侯使国归父来聘夏四月辛巳晋人及姜戎败秦师于殽

外相败不书【据成三年诸侯伐郑郑败诸丘與四年郑疆许田许败之展陂之类】此何以书恶晋也晋之伯秦有力焉自城濮以来无役不从也文公未葬襄公墨衰及姜戎氏要秦师于殽败之夫晋帅天下之诸侯以攘外寇存中国也秦有力焉而及姜戎败之秦晋之構怨自是始更三君交兵无虚岁曾不十年晋遂不竞而楚伯是故外會师而不及【据隐五年邾郑伐宋成九年秦人白狄伐晋之类】特书及而晋侯贬称人【本穀梁】然则善秦与自韩原秦师无君大夫则非善秦也晋遂不竞而楚伯秦亦与有力焉耳

癸巳葬晋文公狄侵齐公伐邾取訾娄秋公子遂帅师伐邾晋人败狄于箕

中国败外域不书【据隐九年郑人大败戎师闵二年虢公败犬戎之类】唯晋特书之特书晋者皆病晋也故晋侯贬称人晋帅天下诸侯以攘外寇存中国也前年狄侵齐去年狄侵衛衛为之迁帝丘而晋不能救于是伐晋盖仅而后胜之也晋侯称人以是为盟主病矣

冬十月公如齐十有二月公至自齐乙巳公薨于小寝【左氏穀梁传同】陨霜不杀草李梅实晋人陈人郑人伐许

春秋后传卷五

〈经部, 春秋类, 陈氏春秋后传〉

钦定四库全书

春秋后传卷六

宋 陈傅良 撰

文公

元年春王正月公即位二月癸亥日有食之天王使叔服来會葬夏四月丁巳葬我君僖公天王使毛伯来锡公命

自隐至文六君惟桓文书即位而后书锡命以其自即位也

晋侯伐衛

于是晋告于诸侯而伐衛先且居曰效尤祸也请君朝王臣从师晋侯朝王于温先且居胥臣伐衛则其但书君何春秋罪戎首苟其君意虽卿帅不书是故伐衛书晋侯不书先且居伐秦书晋侯不书栾书【事在成十三年】灭偃阳书晋侯不书荀偃士匄【襄十年】伐晋书衛侯不书孔圉【哀元年】所谓春秋深探其本也春秋虽罪戎首而宥不得已是故小国役大国往往不书伐齐之役邾邾不书【事在哀十年】灭陈书楚不书宋戴恶也

叔孙得臣如京师衛人伐晋

此衛孔达也其称人何大夫将犹称人也

秋公孙敖會晋侯于戚冬十月丁未楚世子商臣弑其君

楚卒未志【据传楚武王卒于莊四年文王卒于十九年】其志 何世子弑君不可以楚不志也

公孙敖如齐

二年春王二月甲子晋侯及秦师战于彭衙秦师败绩此孟明视也其称师何秦未有大夫也

丁丑作僖公主【有传凡例说在章指】三月乙巳及晋处父盟【有传公羊穀梁同】

朝而遂盟之于是始传曰适晋不书讳之也凡讳国恶耻在公则但书其事不书公者恒辞也讳在其事则但书公不书其事公會晋侯于黑壤为公不与盟故不书盟【宣七年有传】公如晋为止公送葬故不书葬【成十年皆有传】甚讳之也會晋师于上鄆削而不书讳不足以尽之矣是故讳有爱君之谊焉必讥不及君而后讳舍是无讳道矣故曰讳莫如深也

夏六月公孙敖會宋公陈侯郑伯晋士穀盟于垂陇【有传穀梁内大夫可以會外诸侯非是】

晋遂以大夫盟诸侯也大夫而与诸侯敌于是始故书大夫专盟自士谷也士穀非卿也特书之见晋之卑诸侯也然则士穀主是盟也则曷为序士穀于诸侯之下春秋不以大夫主盟也是故讫于宋不以大夫主盟翟泉贬此何以不贬贬不于其甚则于事端余实录而已矣是故书士穀自书士穀而后凡役书大夫桓文之伯也會盟有大夫则但称人【据僖元年會怪邾人二十八年会温秦人之类】必世子也则得次小国之君自垂陇主士穀新城主赵盾而后大夫与诸侯序于是戚之盟书齐国佐【成十五年】沙随之會书宋华元【成十六年】甚者无伯而君与大夫并列于會矣【定十年齐侯衛侯郑游速會于安甫】

自十有二月不雨至于秋七月八月丁卯大事于太庙跻僖公【三传同大事从公穀传】冬晋人宋人陈人郑人伐秦【传言尊秦非经意】

尝书大夫矣此晋先且居宋公子成陈轅涛涂郑公子归生也曷为不序大夫将犹称人也自士穀专盟书大夫自阳处父专将书大夫是故春秋之始大夫将恒称人由救郑之后大夫始贬称人矣

公子遂如齐纳币【公羊有传左氏凡例不取杜说尤悖】

三年春王正月叔孙得臣會晋人宋人陈人衛人郑人伐沈沈潰【传例说在章指】夏五月王子虎卒【说在莊二十二年公穀以为叔服非是】

秦人伐晋

此秦伯也曷为贬称人穀之誓孔子有取焉而秦穆之连兵无虚岁君子以为秦之未离乎西戎也是故自韩原秦不以爵见于经至康公而遂外之终南蒍之作秦非无人也而秦不用诚未离乎西戎也

秋楚人围江雨螽于宋冬公如晋十有二月己巳公及晋侯盟晋阳处父帅师伐楚以救江

晋大夫书帅师于是始大夫强也处父盟鲁侯以王叔桓公伐楚搜于董易中军是故虽荀息里克不言帅师【僖二年】必若处父而后言帅师自是恒书大夫贬而后人之书救何江卒灭于楚也向也曰晋处父今曰晋阳处父命大夫也是故自邠黎来为小邾子无未命诸侯潞子戎蛮子皆有君矣自晋处父为阳处父无未命大夫曹公子首邾庶其皆有大夫矣文宣之后大夫舍宋山无去其氏诸侯舍□子无黜其爵者皆春秋之变文也

四年春公至自晋夏逆妇姜于齐【有传穀梁成礼于齐非是】狄侵齐秋楚人灭江

灭不言围此其书围何以病晋也阳处父伐楚以救江而江卒灭于楚言围见其久也久之所以病晋也僖之三十二年楚鬬章请平于晋晋阳处父报之晋楚始通文公为之也晋侯伐秦衛侯使□俞来聘冬十有一月壬寅夫人风氏薨

夫人某氏薨嫡称也此庄公之妾也则曷为以嫡称称之丧之以夫人之礼也隐公之丧桓母犹有疑焉是故别庙也祔姑称溢佯然如夫人则自文公之丧成风始也五年春王正月王使荣叔归含且赗

以成风之丧赴京师也赗常事不书唯赗仲子成风特书之则遂命为夫人也春秋之初犹以是为非常事也宣之敬嬴襄之定姒昭之齐归虽命之为夫人不复书矣孟子卒则不赴于京师孔子曰夫人之不命于天子自鲁昭公始也三月辛亥葬我小君成风王使召伯来會葬

王不称天子追锡桓公见之至是再见其再见何以夫人之礼丧成风也庄僖之际天下知有盟主而已而襄王之季年更有事于诸侯于是叔服會葬毛伯锡命尤汲汲于鲁也尤汲汲于鲁而何为乎成风一人赗含之一人葬之以是怀诸侯吾见周之益陵夷也宰咺尝以赗妾母贬则召伯何以不贬王公一体也宰书名则王不待贬而自见王不称天则召伯不待贬而自见也文武之教著于南雅莫急于君夫人也桓以少篡长成风以庶乱嫡王道熄矣而庄襄不能正又从而褒赏之是以天命施之天讨也是故皆不称天夏公孙敖如晋秦人入都秋楚人灭六冬十月甲申许男业卒

六年春葬许僖公夏季孙行父如陈秋季孙行父如晋八月乙亥晋侯驩卒冬十月公子遂如晋葬晋襄公晋杀其大夫阳处父【有传说在章指】晋□射姑出奔狄

两下相杀不道于是□射姑使续鞠居杀阳处父则其书国杀何春秋之法苟有贼而不知则其君之罪也晋搜于夷使□射姑将中军阳处父改搜于董易中军襄公无讨焉于是使续鞠居杀阳处父是故晋胥童杀三郤栾书中行偃杀胥童齐崔杼杀高厚郑子展子西杀公子嘉皆称国而已矣闰月不告月犹朝于庙

七年春公伐邾三月甲戌取须句遂城郟夏四月宋公王臣卒宋人杀其大夫【有传穀梁诛有罪也非是】

此公孙固也则其不名何昭公之大夫也昭公新立曷为于此焉不名其大夫是春秋之大变也自隐而下春秋治在诸侯天子无道则不徒罪诸侯也于是有宰书名王子书名甚者王不书天自文而下春秋治在大夫诸侯无道则不徒罪大夫也于是有弑君称人甚者称国弑君天下之元恶也舍贼而称人自宋昭公始是春秋之大变也是故终昭公之世不名其大夫春秋有天下之辞焉有一国之辞焉有一人之辞焉于晋灵公凡會盟皆不序诸侯是天下之辞也于鲁莊公凡會齐襄皆书人是一国之辞也于鲁桓公凡大夫将皆不言大夫于宋昭公凡大夫皆不名是一人之辞也

戊子晋人及秦人战于令□

晋将尝书大夫此赵盾及秦伯也曷为贬称人秦晋之交兵于是再世自令□之后连兵不悉书矣于八年秦伐晋取武城不书于十年晋伐秦取少梁不书晋襄公卒欲立长君逆公子雍于秦秦康公以兵送之晋御秦师则康公何贬焉春秋贵谊不贵惠尚治不尚功托人之孤至于交战是亦伐丧而已矣是故宋襄公立齐孝公战于甗贬人之秦康公送晋公子雍战于令□贬人之

晋先蔑奔秦【不言出从公谷】狄侵我西鄙秋八月公會诸侯晋大夫盟于扈【传说在章指】

垂陇尝书士穀而序诸侯此公會齐侯宋公衛侯陈侯郑伯许男曹伯晋赵盾也则何以不序晋始失伯也凡称诸侯必先目而后凡也前有王人后无王人书曰诸侯盟于某则王人尝不与也【据首止王世子葵丘宰周公】前无吾君后有吾君书曰公會诸侯盟于某则吾君尝不与也【据僖二十一年盟薄二十七年盟宋】未始有不与者也而但曰诸侯一从而再有事也【僖二十八年围许襄十八年盟祝柯二十五年盟重丘】非一役而再有事则非凡辞也非凡辞者散辞也

冬徐伐莒公孙敖如莒涖盟

八年春王正月夏四月秋八月戊申天王崩冬十月壬午公子遂會晋赵盾盟于衡雍乙酉公子遂會雒戎盟于□【有传】公孙敖如京师不至而复丙戌奔莒螽宋人杀其大夫司马【有传】

此公子邾也则其不名何昭公之大夫也于是襄夫人因戴武之族以杀大司马公子邾则何以称人称人杀有罪之辞也六卿和公室乐豫舍司马以让公子邾则曷为例之以有罪不名所以别其非有罪也不名所以别其非有罪则称人众辞也

宋司城来奔【有传】

大夫奔恒名之此荡意诸也则其不名何昭公之大夫也凡奔非其罪不书苟接我也不可以不书则不以同盟之例书之是故未有书官者于是官从其官司司马司城是也未有书字者于是字从其字【据宋子哀】

九年春毛伯来求金【有传公羊传】

自是鲁虽不修贡周无求矣周室益衰而顷王之崩葬不见于经

以上内容仅为本文档的试下载部分，为可阅读页数的一半内容。如要下载或阅读全文，请访问：<https://d.book118.com/337100134140006112>